



Diasabra November 17, 2012 - Edicion-7 Vol.192052 Sta.Cruz#110  
Tel: 585-9500 Fax:585-0951 - E-mail: solodipueblo@gmail.com 1.50

E prome comerciante a baha na awa pa motibo di criminalidad

## COMERCIANTE- Y INVERSIONISTANAN TA BIBA CU TEMOR PA CRIMINALIDAD

Na Gielstraat:

### Caso di hincamento door di jaloezie

Diabierna anochi na Gielstraat un problema formal a sosode unda un persona a keda hinca. Cu urgencia ambulance a transporta e persona pa hospital. Na yegada di patruya a topa cu un homber hinca na pia y un glanza blanco di e conocido Jean Pierre Croes, cu ta esun cu a hinca e victima. Di biaha el'a keda deteni pa Polis. Recherche a wordo poni na altura ya cu na e sitio e mesun momento tabatin bashamento di bala.



## Accidente grave na Tanki Leendert ayera nochi



Den careda di 10'or di anochi a sosode un accidente grave cu herido na Tanki Leendert. Un auto blanco maneha pa un chauffeur bao influencia a core den su robez pa cual e auto shinishi a dal den dje. Un SUV tras di e auto shinishi a dal tras di e auto shinishi. Heridonan a wordo transporta pa hospital.

Corda riba bo bingo awe na TOP FM  
Bo kaarchi ta den  
Solo di Pueblo  
Premio ta fls. 150,-  
Bingo ta 10:30 am!  
Scucha Liesenny, Gina y  
Rupi Rup  
di 9'or pa 11'or

Maute Restaurant a cera,  
15 hende a perde trabao!



## Ultimo Noticia

Informador Glenn Camelia a logra y a cera 11 asiento consistiendo di PS, PAIS, PNP y Glenn Sulvaran di ex - PAR, como independiente pa asina por pasa over pa e proceso di formacion di Gobierno pa Corsou. Partido PAR a keda basta desapuntá despues di último desaroyonan rond di formacion di gobièrno y a retira su cooperacion.



Famoso  
pelotero di  
NY Yankees  
Derek Jeter  
otro siman na  
Aruba

Un pabien  
ta bay na  
Carl Giel di  
MEP cu su  
birthday!  
Corda riba  
e treat!





## WWE Survivor Series PPV na Canal 113 riba Cable Digital



STA. CRUZ -- E **Survivor Series** di WWE nr. 26 ta tuma lugar diadomingo próximo dia 18 di November 2012 pa 8'or di anochi. Un biaha mas, SETAR ta duna oportunidad na tur fanatico di e mundo di wrestling pa busca nan pay-per-view y asina disfruta di e evento "en bibe" den comodidad di nan propiocas. "Survivor Series" ta tuma lugar pa promer biaha na Barkers Life Fieldhouse na Indianapolis, Indiana. Algun di e

peleanan grandi di e anochi ta: **Big Show** contra **Sheamus** pa e **World Heavyweight Match** **CM Punk** contra **John Cena** contra **Ryback** pa e **Triple Thread Match** pa **WWE Championship** **Eve Torres** contra **Kaitlyn** pa e **Divas Championship** Ta transmiti e evento na Canal 113 di Cable Digital. Pa aplica pa e pakete por pasa cualkier Teleshop di SETAR, SETAR Store of yama 525-1700. Pa mas informacion bishita [www.setar.aw](http://www.setar.aw)

## Turista Venezolano riba honeymoon cu placa falso den casino

STA. CRUZ -- Central a dirigi un patruya na un casino, diahuebs, na un highrise hotel. Na e sitio polis a papia cu e manager cu a declara cu nan a laga e turista keda den vecindario

te ora polis yega. E turista ta splica cu e ta riba su honeymoon. E \$100 ta un regalo. Polis a confisca e biyete y e turista a haya un warning pa no us mas placa falso.

## Parlamentario di MEP, sr. Arondino Croes: Forza laboral a bay atras y gobierno no a haci nada pa recupera esaki

STA. CRUZ -- Prome Minister a felicita gremio comercial y sindicato pa e logro di dialogo social. Parlamentario Arondino Croes ta haya importante pa envolve gremio y partnernan den dialogo social. Loke cu Parlamentario Arondino Croes ta haya falta den dialogo, ta puntonan cu ta mishi directamente cu e comunidad, entre nan e forza laboral. Puntonan pa dialogo: E decisionnan cu e keda tuma den dialogo social, tabata riba asuntonan hopi chikito. Parlamentario Arondino Croes ta di pensamiento cu gobierno tin punto mucho mas grandi pa traha den e dialogo social. Na banda di yuda esnan menos privilegia den nos comunidad, mester papia riba cosnan cu ta toca tur hende e pais aki. E reforma di finanzas publico ta un punto importante pa delibera den dialogo social.



**Forza laboral:** Segun Parlamentario Arondino Croes, Minister di Finanzas a indica cu e forza laboral a bay atras cu 20 pa 35 porciento durante e ultimo tres aña nan. Ora cu gobierno di AVP a tuma mando na 2009, e economia di pais Aruba tabata malísimo, segun AVP. Minister di Finanzas mes ta expresa cu e gobierno anterior tabata malo, pero despues di tres aña di gobernacion,

e mandatario mester bisa kico e la haci pa trece e direccion nobo. "Te ainda MEP no ta waak contenido cu gobierno a duna durante di campaña, pa drecha e situacion di forza laboral", segun Parlamentario Arondino Croes a bisa.

**Tira culpa:** Tres aña di gobernacion di AVP ta mustra cu ainda 60 porciento di e pueblo no tin e forza economico cu tanto gobierno a papia di ta bay introduci. Ora bisa cu e decisionnan den dialogo no ta afecta poder di compra, esaki no ta cuadra totalmente, segun Parlamentario Arondino Croes. E gastonan di gobierno a aumenta desproporcionalmente cu consecuencia pa e poder di compra di pueblo. Te ainda ta keda cumpla 8 añanan di gobernacion di MEP, pa loke gobierno ta pasando aden awe.





Según Parlamentario di MEP, Ing. Edison Briesen:

## Gobierno no ta haci nada pa resolve problemanan nos dilanti



STA. CRUZ -- Parlamentario Ing. Edison Briesen no ta comprende con gobierno ta bisa cu e medidanan lo no tin consecuencia pa e pueblo. E rapport di Banco Central di 2011 ta bisa cu e medidanan a pone cu e productonan relata na turismo a aumenta den prijs cu 1,3%. E gobierno aki no kier papia di gastonan pero solamente kier papia di entrada adicional. Incomprendibel con gobiernoporbisacunan no sa kico ta bay pasa una vez nan introduci medidanan. Kier tira un machete den turismo, pero kier warda te otro aña pa mira e consecucionan di e medidanan. E gremionan y AHATA ta full comodo. Antes AHATA tabata tin un presupuesto di tres pa cuater miyon den nan portofolio pa haci mercadeo pa Aruba. Awor nan tin 76 miyon den caha di gobierno

pa haci y deshaci cu mercadeo. Pues nan no ta saca placa di nan mesun fondo pa yena nan negoshinan. Di mes nan ta keda boca cera e ora ya cu nan no ta gasta nan mesun fondo. Antoe ora ey e pregunta ta: "Ken ta enriquece ken?" Te ainda no ta comprende cual direccion e gobierno ta tumando. E rapport di Banco Central a menciona siete punto. Valero a cera, Aruba no tin diversificacion, costo di bida ta sigui aumenta, e poder di compra ta bay cada dia mas atras, e pueblo ta enveheciendo cual ta pone presion riba AZV y SVb. Gobierno no ta papia di gasto pero solamente di entrada. Di otro palabra, no ta mira e gobierno aki haci nada pa resolve e problemanan nos dilanti y pa dia cu gobierno dicidi pa haci algo ya lo ta hopi laat, segun Parlamentario Ing. Edison Briesen.

E prome comerciante a baha na awa pa motibo di criminalidad

## COMERCIANTENAN Y INVERSIONISTANAN TA BIBA CU TEMOR PA CRIMINALIDAD

STA. CRUZ -- Mesun temor y preocupacion grandi cu ta reinando bao di comerciantenan Macamba na Aruba, awor a bin resulta di tin efecto pisa y determinante riba otro comerciante- y inversionistanan di exterior. E siman aki Aruba a conoce un caso unda cu Deurwaarder a bay na un establecimiento na Paseo Herencia, unda cu inventario completo di un restaurant a wordo tuma bao di beslag. Lo ta trata di un negoshi di un of mas socio Venezolano cu a cuminsa cu un restaurant un aña pasa na e Mall conoci den area di hotelnan grandi pero pa motibo di criminalidad nan no a hisa solamente e bandera blanco pa give up y bisa ta basta; nan a baha na awa tambe! Eseytae informacionnan no - oficial cu nos a haya for di fuentenan cu a duna di conoce, cu e comerciante Venezolano cu tabata atende cu e restaurant a wordo confronta dos biaha tras di otro cu atracadornan. Su bida

como comerciante a wordo haci imposibel pasobra si ta tras di otro den aparentemente dos siman di tempo bo ta wordo atraca, anto ta mas cu logico cu bo no por funciona normal mas den bo negoshi. Bibando cu temor pa su bida y sin cu el 'a haya e atencion y e proteccion adecuado, e comerciante kende lo a sufri tanto personal como financieramente hopi di e impacto di criminalidad, lo a dicidi cu e ta bandona Aruba den forma abrupto. Cuanto debe e lo a laga atras tanto na Belasting como na otro companianan cu tabata bende nan productonan y servicionan na e restaurant aki no ta conoci pero tabata tin suficiente motibo pa laga Deurwaarder bay na e lugar y instrui un grupo di trahador pa saca tur cos y hiba nan bao di beslag na otro caminda. E asunto aki ta un señal hopi negativo pa inversionnan internacional na Aruba. E caso recien di e comerciante kende a wordo haya morto

na Malmok, a laga mas comerciante ainda bira nervioso. Bao di e colonia di comerciantenan, inversionistanan y esnan di placa cu a bin di Hulanda pa establece nan mes aki, tambe ta reina un temor grandi relaciona cu atraconan y cual desaroyo Solo di Pueblo a señala algun dia pasa caba. Anto awor e caso aki tambe ta bin extra riba e bolo di criminalidad cu e gobierno di AVP a horna pa pueblo y comercio hinca den nan stoma pa 3 aña caba y bayendo pa 4 y riba dje cu cara di Coco bisa pueblo cu criminalidad no a subi y cu te hasta el'a baha. Awe ainda un comerciante Hulandes Europeo a bisa nos cu e gobierno di AVP ta e decepcion mas grandi cu el'a maak mee den tur e añanan cu e ta bibando na Aruba y el'a bisa no un biaha y no dos biaha abiertamente den un supermercado pero hala di biaha tras di otro; Geef mij duizend keer liever MEP y niet deze Kloo...!" anto cu rabia!

## Show di baile di Simadanza 23, 24 y 25 di November

STA. CRUZ -- E preparacionnan ta tumando lugar pa un otro bunita show di baile di school di baile Simadanza. Manera custumber Simadanza ta scoge un tema pa su show y e biaha aki ta dedica e show na tur mucha di mundo y specialmente esnan di Aruba. Na un manera creativo y artistico lo presenta diferente aspecto den bida di un mucha. Por wak e mama orguyoso cu ta spera e yegada di su yiu, e mucha formando parti di un famia, e importancia di bon alimentacion, su tempo liber, enseñanza, na caminda pa bira un profesional. Pero den bida di un mucha por surgi desaroyonan menos agradabel tambe manera peer pressure, abuso etc. E alumnonan di

Simadanza lo presenta e aspectonan aki tambe p'asina yuda concientiza tur hende con importante ta pa nos inverti den educacion di nos muchanan. E docentenan di baile Ina Profet y Tracy Pietersz bao guia artistico di Astrid Salazar a traha duro hunto e alumnonan pa por presenta un otro bunita show pa e publico amante di baile. E show ta titula "Nos pret'i wowo" y cada mucha ta e pret'i wowo di su mayornan, famia, amistad y otro conocirnan. Dia 23 y 24 di November e show ta cuminsa pa 8'or di anochi den Cas di Cultura y diadomingo 25 di November lo ta pa 3'or di atardi. Kaarchinan ta obtenibel na Simadanza durante siman for di 3'or pa 6'or di atardi y durante dia na Cas di Cultura.



# Contrato colectivo nobo entre ENNIA y FTA



**STA. CRUZ--** Durante un ceremonia oficial y ameno a firma un contrato colectivo nobo entre Ennia Aruba y sindicato FTA. E contrato colectivo nobo ta valido te 2016 y ta reemplaza e contrato existente cu a termina e aña aki. Durante e ceremonia di firmamento, Presidente-Director di ENNIA Caribe Holding Aruba, mr. Ralph Palm a declara cu ENNIA ta sumamente satisfecho cu e resultado, pa motibo cu ENNIA a logra negocia un contrato colectivo nobo cu ta na bienestar tanto pa empleadonan como ENNIA. E contrato colectivo ta encera cambianan positivo, cu compensacion di aumento di gasto di bida y mas incentivo entre otro pa educacion di yiunan di empleadonan. Presidente Director

**Ralph Palm** a expresa su aprecio cu e negociacionnan a tuma lugar den un esfera di respet mutuo. Sr. Palm a expresa optimismo pa futuro di ENNIA na Aruba. "E hecho cu nos por a firma e contrato colectivo aki ta pa motibo cu nos tin confianza den futuro di ENNIA. Nos ta un compania cu 65 aña di existencia cu un posicion financiero y di liquidez sumamente fuerte cu ta reconoci tanto local y internacionalmente pa institutonan financiero y di seguro". E situacion financiero fuerte di ENNIA ta garantiza cu ENNIA lo sigui haci inversionnan tanto den empleadonan di ENNIA como comunidad di Aruba, Presidente-Director Palm a declara. Pa ENNIA a firma sr. Ralph Palm y FTA a firma sr. Rudy Geerman (Presidente FTA)

STA. CRUZ -- Manera a splica den e comunicado anterior, un negoshi no mag stipula condicionnan general pa loco. Condicionnan general ta stipulacion- of clausulanan por escrito formula pa ta parti di un acuerdo of contract cu excepcion di stipulacionnan cu ta indica e esencia di rendimiento, manera por ehempel prijs. E ley di condicionnan general ta papia di usuario (negoshi) y contrapartido (consumidor). E usuario den mayoria caso ta e negoshi cu ta stipula e clausulanan como parti di un contract. E contrapartido (consumidor) ta esun cu lo mester acepta e condicionnan general cu ta aplicabel pa e acuerdo, sea por escrito of di otro forma, y hopi bes esaki ta e consumidor. Ley a pone reglanan pa stipulacion di condicionnan general. Ley tin un lista preto di condicionnan cu ta prohibi y pues no mag aparece den ningun contract. Akibao ta sigui e lista preto di condicionnan general manera ta aparece den nos codigo civil buki 6, articulo 236. **Lista preto di condicionnan prohibi:** a. cu ta limita of exclui e derecho di e consumidor pa exige e prestacion (producto of servicio) cu e negoshi a priminti; b. cu ta limita of exclui autoridad di e consumidor pa disolve e contract manera regla den ley di contractnan reciproco (seccion 5: wederkerige overeenkomsten); c. cu ta limita of exclui e consumidor di e competencia cu ley ta duna pa suspende cumplimiento of cu ta duna e negoshi un poder mayor cu loke ley ta duna pa suspende; d. pa e negoshi mes determina si el a keda sin cumpli cu un of mas compromiso, of cu si e ehecucion di e derechonnan cu e consumidor tin segun ley den caso di un tal incumplimento (defecto), ta depende di e condicion cu e consumidor ta demanda un tercero prome den un caso; e. Bao cual e consumidor ta duna e negoshi permiso

15 November 2012

Dienst Huur- en Consumentenzaken ta informa:

## Condicionnan General di Contract, Lista Preto



di antemano pa laga su obligacionnan pasa pa un tercero di e acuerdo cu un di e maneranan menciona den e ley di deuda y suscripcion di contract (Titulo 2, seccion 3), a menos cu e consumidor tin e autoridad pa disolve e acuerdo na cualke momento, of cu e negoshi ta responsabel pa cumplimiento door di e tercero, of cu e transicion ta tuma laga relaciona cu e traspaso di un compromiso na cua tanto e responsabilidadnan como e derechonnan ta pertenece; f. cu den caso cu e derechonnan di e negoshi cu ta sali for di e acuerdo bay pa un tercero, ta exclui of limita autoridadnan of defensanan cu e consumidor lo por invoca contra un tercero; g. pa cual un plaso of termino legal den cual e consumidor mester haci un derecho conta, ta corta of limita e derecho te menos cu 1 aña; h. cu den caso cu durante ehecucion di e acuerdo daño wordo causa na un tercero door di e negoshi of door di un persona of algo pa cual e ta responsabel, e consumidor tin e obligacion di sea cubri e daño completamente na un tercero, of mirando e relacion cu e tin cu e negoshi, carga un responsabilidad mayor cu loke ley ta exige; i. cu e negoshi ta duna su mes e permiso pa hisa e prijs cu el a stipula denter di 3 luna despues di a cera e contract, a menos cu e consumidor tin autoridad pa den e caso ey disolve e contract; j. cu den caso di un acuerdo pa regularmente

entrega bienes, incluyendo coriente, of pa haci trabaonan regularmente, esaki ta conduci na prolongacion of renovacion silencioso di un contract pa mas cu 1 aña; k. cu ta limita of exclui e autoridad di e consumidor pa entrega prueba, of cu ta cambia e reparticion di prueba, manera ley ta stipula, pa pone e consumidor den desventaha, sea pasobra e ta contene un declaracion di e negoshi riba solidez di su desempeño, of pasobra cu por prueba culpabilidad di e negoshi pa incumplimento; l. cu ta desvia di articulo 37 di Buki 3 den desventaha di e consumidor, a menos cu esaki ta relaciona cu e forma di e declaracionnan cu e consumidor tin di duna of cu ta determina cu e adres cu e consumidor a duna e negoshi, por sigui wordo considera como tal, te ora notifik'e di un adres nobo, na unda cu na momento cu un consumidorr cera e acuerdo su adres real ta na Aruba, y e escoge un otro adres, otro cu e caso cu pa un tempo e no lo tin un adres real conoci na Aruba, a menos cu e contract tin di haci cu un bien registra y cu a scoge adres di un notario como lugar di residencia; m. cu ta provee pa resolve un conflicto door di un otro cu no ta huez kende pa ley tin e autoridad, of cu no ta un of mas arbitro, a menos cu ta duna e consumidor un termino di por lo menos un luna despues di cu e negoshi a haci un apelacion por escrito riba e clausula pa scoge pa bay huez. Na e articulo aki bo no por adkiri derecho, pero pa mas informacion riba leyman cu ta trata derecho di consumidorr, haci un keho of registra un abuso contra consumidor yama of pasa personalmente na Dienst Huur en Consumentenzaken na Wayaca 33, tel: 5829914, bishita nos website: [www.dhc.aw](http://www.dhc.aw), "like" nos riba facebook, sigui nos via twitter of e-mail nos na [info@dhc.aw](mailto:info@dhc.aw).



## DIA DI SALUD

Na Estrella Club, awe diasabra 17  
November 2012, di 8:15 te 11' or

STA. CRUZ -- Fundacion CVA, cerebro vascular accident y Estrella Yout Basketball Aruba Lions ta organisa un mainta di salud na Estrella Club, diasabra 17 November 2012, cuminsando pa 8:15 te 11' or. Bin na yuna, pa controla sucu. Lo check cholesterol, presion y bo BMI, body mass Index pa solamente 5 florin. Bo ta haya e resultado un rato despues. Pa 9'or di mainta e Estrella peewee basketball lo hunga contra otro y pa 10'or di mainta lo tin un wega di mini Estrella: Aruba Lions vs. Centro di Bario Brazil Anchor Bulls.

## KIWANIS CLUB OF ARUBA TA INSTALA UN MIEMBRO NOBO



STA. CRUZ -- Recientemente Kiwanis Club of Aruba tabatin e placer di por a instala un miembro nobo den persona di: sra. Indra Anthony Perreira, Indra a wordo introduci door di president Julisa Arends-Hoevertsz y a wordo gesponsord door di FK Ebby y FK Ryan. Sra. Indra ta Head Operation y marketing na Rode Kruis Aruba. Tambe Indra ta famia di e fundador di Kiwanis Club of Aruba sr. Clint Whitfield. FK Oscar a duna un presentación

di 47 aña di historia di Kiwanis Club of Aruba. Kiwanis ta un organizacion global di voluntarionan dedica na cambia e mundo pa via di un mucha y un comunidad cada biaha y tin como lema: sirbiendo e muchanan di mundo. Kiwanis Club of Aruba ta activo den e comunidad Arubano desde 1965. Pa mas informacion di Kiwanis Club of Aruba y of su actividadnan por acudi na [www.kiwanisaruba.org](http://www.kiwanisaruba.org). Tambe por bishita e website di Kiwanis Internacional na [www.kiwanis.org](http://www.kiwanis.org).

## PUEBLO A HAÑA SU PEN BEK

Pa kualkier informacion  
[solodipueblo@gmail.com](mailto:solodipueblo@gmail.com)  
of  
☎ 585-9500

Sra. Joanne Arends di AAA:

## Aserca Airlines cumpliendo 20 aña



STA. CRUZ -- Segun sra. Joanne Arends di AAA, e compania di aviacion Aserca Airlines ta bula pa mas di 20 aña caba pa Aruba. Den nomber di aeropuerto di Aruba a yama bon bini na Aruba na e invitadonan especial,

sra. Lennies Toro, vice presidente comercial de Caracas, sr. Pierre Croes, gerente di stacion di Aruba y tambe e ekipo di Aserca Aruba, sra. Ronella Tjoe-A-Sjoe, CEO di oficina di Turismo di Aruba y Suplente

di Aeropuerto, sra. Barbara Brown. Aeropuerto ta contento di por a comparti cu Aserca Airlines e celebracion di 20 aña di existencia di Aserca. Aserca Airlines ta partner di Aruba for di dia 14 di September 1992. E fecha ey tabata un fecha especial pasobra e tabata e prome vuelo comercial y internacional tambe di Aserca pa Aruba. Esey ta significa un total di 20 aña di contribucion na e industria di aviacion. Actualmente Aserca ta opera aproximadamente 20 vuelo pa luna cual ta cinco cu frecuencia pa siman. Tambe nos por a mira e prome 10 lunanan di aña un increase di 20% di pasahero den comparacion cu e mesun temporada di 2011. No sa si ta casualidad pero ta 20 aña, 20 vuelo y 20% di increase riba pasaheronan. Aruba ta satisfecho di tin Aserca como partner y ta desea di tin Aserca hopi aña mas na Aeropuerto di Aruba. Masha pabien y hopi aña mas.



## Anuncio:

## Douane lo ta habri tur diasabra for di 17 di November pa 22 di December

STA. CRUZ -- Pa motibo cu tur aña comercio tin keho riba e tardanza di nan mercancia pa dianan di fiesta di December y cuminsamento di aña, Hefe Suplento di Douane, mr. Stephen Maduro a haci peticion na Ministro di Finanzas pa duna permiso pa douane por duna e servicio necesario na comercio den e dianan menciona promer cu Pasco. Douane seccion di Stad cu ta keda den edificio central di Douane na Playa lo ta habri pa duna comercio e servicio cu e ta ricibi diariamente. Esta haci declaracion di documentonan, haci pago y ricibi nan mercancia na vrijmaking. Douane seccion di Stad ta habri desde 8:00 te cu 12:00'or di merdia. Esaki ta riba tur diasabra cuminsando awe dia 17 di November te cu dia 22 di December.

## Homber a laga auto para na Caya Bembe

STA. CRUZ -- Polis a dirigi pa Caya Bembe riba diahuebs. Na e sitio polis a topa un pick-up bandona para banda di caminda. Un testigo a declara cu un homber a parkeer e pick-up eyman y sali core bay. El'a duna polis e descripcion di e homber. Polis a bay cu e yabi warda pa mas investigacion.

## Señora a perde articulo personal ora ladron a horta den su auto

STA. CRUZ -- Diahueps un señora a presenta na warda di strandpolitie y a declara cu desconocirnan ta horta den su V-car. El'a perde un tas preto florea cu 2 Visa, dos paspoort, \$250, yabi di hotel y algun articulo pa cuida personal.

## Segun Parlamentario Arondino Croes:

## EPI sector turistico ta pasando dos luna caba den un situacion penoso

Gobierno fayando cu turismo

STA. CRUZ -- Pa dos luna caba EPI ta pasando den un situacion penoso, según Parlamentario Arondino Croes. Mientras cu e lema di gobierno ta "Nos compromiso cu Aruba" y nan ta bisa cu turismo ta un di nos fuentenan di entrada mas importante pero na mes momento ta negligisha nos hobennan cu ta studiando den ramo di turismo. Pa dos luna caba no por a ehecuta e examen di Food Service. Aparentemente mester firma pa por haya material. Freezer y cooler ta dañá sin, menciona e 10 stoofnan tambe cu no ta den funcion. Parlamentario Arondino Croes ta bisa cu ta stimula turismo di un banda pero di otro banda no ta encurasha nos hobennan pa sigui den ramo di horeca y ta negligisha nan necesidadnan. Awor mas cu nunca cu ciere di e refineria nos mester cuida y stimula nos turismo. E gobierno aki, según parlamentario



Arondino Croes no solamente ta descuida nos turismo sino ta corta den nos turismo. E siman aki a anuncia un serie di medidadanan den e sector turistico

hungando cu pan di hopi hendenan na Aruba. Esaki sigur nos no por bisa nos tin un gobierno responsabel y ta tempo pa e gobierno bay cas.


# MESTER DI PLACA? EMPEÑA Y CUMpra ORO

## PASA Y COMPROBA PA BO MES!



### JUWELENHUISJE

ORARIO 10AM - 6PM DIALUNA TE DIABIERNA





Sra. Magaly Maduro, Coordinadora di Voogdijraad:

## Embarazo Hubenil ta keda un problema grandi den nos comunidad



STA. CRUZ – Segun sra. Magaly Maduro, Coordinadora di Voogdijraad, e problema di embarazo hubenil aki na Aruba ta birando cada dia mas y mas. Voogdijraad ta hunga un papel hopi importante den nos comunidad. Pa e motibo aki nan kier enfoca riba e mamnan hoben dus e “tiener - moeders.” Actualmente hopi ta e hobennan, tanto mucha muher como tambe mucha homber cu ta bira mama y tata na un edad hopi hoben. Na aña 2010 tabata tin mas o menos 300 mama hoben cual e aña aki tin te cu awor 50 pero no tin tur registra ainda. Ta bon pa tur hende sa cu na momento cu un hoben menor di 18 aña sali na estado,

e mes no por tin e custodia riba su yiu. Aki Voogdijraad ta cay aden y lo yuda pa waak ken lo ta e persona mas adecua pa haya custodia di e baby. Voogdijraad ta hay’e confronta cu basta problema ya cu e hoben ta menor ainda. Hopi di e hobennan aki ta entre 13 pa 15 aña sin trabao, mucho menos cas y e mayornan no tur ora ta coopera. Tin te hasta ta haya reaccionnan agresivo. E siman aki mes tabata tin un melding pa maltrato di un mucha di 14 aña cu a sali na estado. Hopi ta e partinan caminda cu Voogdijraad ta purba di yuda y duna un man pero door di tanto aspecto esaki no ta logra tur ora, segun sra. Magaly Maduro.

Sr. Ady Thijsen di MEP:

## Ora MEP a aumenta AZV tur a critica pero awor niun stof ta bula

STA. CRUZ – Durante un conferencia di prensa di partido MEP nos a compronde for di sr. Ady Thijsen cu awor cu Gabinete Eman a aumenta tur cos, ningun stof ta bula for di ningun sector ni gremio. Pero tempo cu gobierno anterior a aumenta AZV, tur hende a critica. Tempo cu Booshi Wever tabata minister di Salubridad el’ a aumenta e tarifa di AZV na 2% cual a haya reclamo di tur gremio cu a bira loco. Fraccion di MEP a opta e tempo ey pa e bira 0.6% y 1.4% ya cu e trahador o por paga mesun premie cu e doño di trabao. Criticanan



pisa a bin di e gremionan di cual awor nan mes ta laga AZV bira 1% y 1%. Unda e consistencia ta kedando? Gremionan mes ta laga esaki sosode awor di cual ta haci cu e economia lo sigui bay atras. Tin un aumento enorme

di criminalidad como tambe problemanan social. Si bo papia di claridad den e dialogo social, lo bisa cu e pilar economico ta turismo pero por mira cu den e board di ATA no tin un representacion di un gremio sindical. Dicon gremio sindical no ta representa den e board di ATA ya cu ta papia met de mond vol tanden di un tri-partite? Esaki ta cosnan cu ta pone sinti manera cu cosnan ta bay malo cual no ta mira e realidadnan pa Aruba. Na momento cu ta trata e topiconan aki mester tin mas seriedad, segun sr. Ady Thijsen.

## Campanja di Fin di Aña Cu

# HERSHEY'S

Y

## WWW.BANWAKLUZ.COM



**-Pa participa pa gana un di e 3 premionan:**

\*Trece cualkier pakete di Hershey's na TEC Inc, Arendstraat 103, Oranjestad Aruba

\*Tur e marcanan menciona abou por participa

\*Bo ta ricibi un ticket pa pone den tombola

\*E Campanja ta valido di 5 Nov. pa 4 Jan. y e ganadornan lo wordo anuncia 5 di Januari 2013

**-Pa participa pa gana un Candy Basket tur siman y e 3 premionan:**

\*Upload un pic creativo cu un pakete di HERSHEY's riba  di BAN WAK LUZ

\*TUR siman lo saca un ganador di e basket di e potret cu mas 'likes' riba Facebook



Agencia di HERSHEY'S:

  
THE EIGHT CONTINENT, INC.  
IMPORT & EXPORT



Remetido

# Gabinete Eman no ta nada green



Net na Pos Chikito, e bario cu semper a sostene AVP incondicionalmente e gobierno di Mike Eman ta cometiendo un crimen feroz contra naturaleza. Asina un paar di luna pasa, bobcat y tractornan bao mando de D.O.W. a basha un area di naturaleza (5000 m³), cu ta destina pa “Groengebied”, abao pa por construi casnan riba bouwkwavels grandi

. Algun di nan ta hasta 800 m³. Probablemente destina pa stranhero atrobe pasobra D.O.W. ta resorta bao di minister Sevinger. Y mas panord den Pos Chikito tractornan a laga un pida mondi sunu sunu, mientras eyan tabatin un borchu poni “Natuurreservaat”. Habitantenan original cu ta biba cerca di e dos terenonan cu a

wordo destrui, a mira un monton di paharito ta bula nervioso buscando nan neishi. Un habitante cu ta biba cerca di e cunucu, cu tabata di F. Croes, a observa un cantidad di paharito, ta bula y yuwana chikito ta core tur for di sla den su cura. Na e tereno destrosa tabatin neishi di shoco y awor despues di e destruccion no ta tende e shoconan mas.

T’asina e gobierno aki ta declara nos shoco e simbolo nacional? T’asina e yuwana ta wordo proteha?

Esaki anto ta e famoso “Green” cu AVP ta proclama tur caminda? E “Locura Green” ta unicamente un pretje pa gobierno por tene conferencia y spart placa, pasobra si bo waak den practica kico ta pasando den barionan cu nos naturaleza ta cos di yora. Na tur caminda cu wordo “drecha” ta beton ta manda, nada di naturaleza a wordo integra den e proyecto “Bo Bario”. E mision politico cu DIP a haya ta pa kita tur naturalza y yena nos pais cu mas cas pa stranhero. E conocido activista Alex di Pos Chikito y su fundacion DEA, a manda diferente carta pa gobierno desde tempo di gobierno di Henny Eman, pero nunca el’a haya contesta. DEA ta promove economia berde di berdad, door di e.o. integra e naturaleza, flora y fauna den e desaroyo di barionan. E fundacion ta contra destruccion di naturaleza pa loco manera tur gobierno na Aruba a bin ta haci pa años caba. Si bo destroza e mondinan cu tin varios mata medicinal den nan manera: Seida, Noni Arubano, mat’iNim, Watapana etc, bo ta kita e habitat di hopi animal endemico di Aruba. Tambe bo ta kita tur e sombra fresco cu e mondinan ta trece cu nan. Cualquier hende cu dos plak’isinti sa esaki. Ta pesey Aruba a bira y lo sigui bira cayente manera fierno asina y ora awa yobe e ta dreña cas paso e tereno ta sunu. DEA a hasta acerca directora di Arubahuis aña pasa, pensando cu su persona por intermedia pero obviamente sin ningun resultado paso

tog nan a destrui gran parti di nos naturaleza na Pos Chikito. Cual te ganancia cu gobierno tin cu e casnan cu ta bay bin? Pasobra teniendo na cuenta e grandura di e kavelnan, e casnan aki no ta destina pa vivienda social. Mirando cu ni minister Sevinger, ni ningun otro hende di gobierno no tin respet pa e obhetivonan di Dea, lo denuncia e destruccion di naturaleza na Pos Chikito na e partido politiconan na mando na Hulanda y tambe na voorzitter di 2de Kamer commissie Koninkrijksrelaties y e minister di Binnenlandse Zaken y Koninkrijksrelaties. Ex premier Hulandes R. Lubbers, tambe ta siguiendo e desaroyonan aki hopi di cerca. DEA lo pone e fundacion di Prinses Irene pa proteccion di medio ambiente tambe na altura di e rosamento di “groengebied y natuurreservaat” cu ta tumando lugar na Pos Chikito. DEA a traha riba varios proyecto pa desaroya economia duradero desde añanan’80. Gobiernonan a haya tempo te cu nan ta den overtime pa por a preveni destruccionnan cu a tuma lugar den bario di Pos Chikito. Ta obvio cu Gabinete Eman no ta nada green. Y parlamento mester stipula leyman pa protege nos medio ambiente. Aunke no tin Indjan den Gabinete Eman toch nan mester purba adopta e filosofia Indjan: “Nos tin e tera presta di nos descendientenan pesey nos mester cuid’e pa nan.” E indigenanan si tabata ser humanonan “Green”. Nan tabata biba den un harmonia perfecto cu naturaleza te ora e blanco a yega.....

Tacamahaca



Sra. Deyanira Frank:

## Sinterklaas ta yega diadomingo awor



STA. CRUZ -- Grandi y chikito ta en espera di Sinterklaas y por bisa cu tur cos ta bayendo bon pa locual ta trata yegada di e homber santo. Sinterklaas lo yega diadomingo 18 di November pa 11'or di mainta na e waf caminda e toren ta. Di eynan e lo sali cu su pietnan den un parada direccion Bestuurs kantoor. Lo angra na APA y lo wordo yama bon bini door di dignatarionan di Aruba y despues lo sigui cu e parada. Ta coy e caminda saliendo for di APA lora na man drechi direccion Bestuurskantoor. Na

Bestuurskantoor lo tin e parti oficial cu diferente grupo di canto y baile como tambe gruponan di modelahe. Pietnan tambe ta bin cu nan show. Adicional lo tin bar y cushina bon surti. Pa e muchanan lo tin face painting, cotton-candy, popcorn etc. E aña aki ta completamentediferente ya cu Sinterklaas lo yega mainta y no atardi manera tur otro aña. Te cu awor ta hayando solamente reaccionnan positivo. Grandi y chikito ta wordo invita pa bin presencia e yegada di Sinterklaas y su pietnan.

Na

## Parlamento Hubenil tambe a duna nan aporte na e Beach Cleanup AHATA 2012



STA. CRUZ -- Recientemente, 10 di November 2012, Minister Hubenil di Medio Ambiente, Tracey van der Biezen y Minister Hubenil di Turismo, Juan Pablo Aguirre Broca di Parlamento Hubenil a aporta na e coastal cleanup di AHATA. Anualmente e proyecto di coastal cleanup ta wordo organiza door di AHATA cu ayudo di voluntario; entre otro mucha- y maestronan di school, algun miembro di Parlamento Hubenil, instancia etc. E aña aki ta e di 11 aña cu AHATA ta organiz'e consecutivamente. Tabata sumamente bunita pa waak cuanto mucha balente a participa na e actividad aki riba nan dia liber. Como Minister Hubenil di Medio Ambiente, mi a keda sumamente contento di a experiencia e interes grandi y entusiasmo di hobennan pa tene nos dushi isla di



Aruba limpi. Hopi liher comunidad ta benta abao cabito di sigaria, tapadera, straw, pampers di baby y mucho mas riba nos beachnan, sin pensa cuanto daño esaki por haci na nos naturaleza. Por ehempel, un cabito di sigaria ta dura aproximadamente 10 aña pa descompone (caba na nada). Abo tabata na altura di esaki? Y botabata sa cu un tapadera di botter ta dura 500 aña prome cu e caba na nada? Den futuro nos mester ta cauteloso y percura pa tur sushi wordo tira den e baki destina, sea

ta container of den e bari sushi den e area of esun den bo cura di cas. Ta tuma un comunidad completo pa mantene nos medio ambiente limpi y pa trece mehoracion pa cu esaki. Danki na tur hoben, grandi y chikito, cu a aporta na e actividad aki. Hunto nos por logra mas! Ban tene Aruba limpi! Un Aruba sin sushi ta HOPI dushi! Un mensahe di Tracey van der Biezen (Minister Hubenil di Medio Ambiente) y Juan Pablo Aguirre Broca (Minister Hubenil di Turismo).



Sr. Rudy Geerman di FTA:

## Despues di algun contra tiempo a logra firma e CAO cu Banco di Caribe



STA. CRUZ – Durante conferencia di prensa di Banco di Caribe, sr. Rudy Geerman a gradici e trahadornan pa nan pasenshi y pa nan confianza di kere den e organizacion di e sindicato. A gradici tambe e dos delegadonan pa nan

aporte pa asina por a firma e CAO cu Banco di Caribe. Aunke por bisa cu no tabata facil ya cu tabata tin algun diferencia di opinion pero a yega na un CAO perfecto. FTA ta contento cu e CAO firma cual a cuminsa dia 1 di Juli 2012 y lo termina te cu 30 di Juni 2016 pues un CAO di 4 aña. Den e CAO aki a mehora e condicionnan basta. Pa locual ta e dianan di vakantie, aki a mira un mehoracion. E trahadornan ta wordo beneficia cu varios aspecto incluyendo e parti di indexering, segun sr. Rudy Geerman.

## Oficina di Propiedad Intelectual, 25 aña di existencia



STA. CRUZ -- 17 November 2012 ta un fecha memorable pa Oficina di Propiedad Intelectual di Aruba. Riba e fecha aki e oficina ta cumpli 25 aña di existencia. Na aña 1987 e oficina aki a keda institui pa brinda tur doño di marca, derecho di autor y patente, tanto local como internacional, e proteccion necesario riba nan marca di producto, obra of invento. Despues cu Aruba a haya su Status Aparte, hopi tabata e asuntonan cu mester a keda regla den ley y derechonan cu ta brota di tanto marca, derecho di autor y patente, cual tambe ta conoci bao di e termino "Propiedad Intelectual" mester a keda regla. Na aña 1987 tabata sr. Frank Croes cu a tuma na su encargo pa establece e oficina aki. Sigur un trabao grandi pa motibo cu Aruba mes no tabata tin nada regla riba e tereno di ley aki. E tempo ey tabata aplica leynan existente di Hulanda y Antiyas Hulandes. Pero ora di haci cambio den ley nos tur sa cu esaki ta un trabao grandi. Na comienzo a tuma leynan over di Antiyas y poco poco a cambia esaki. E tereno di ley aki no tabata mucho conoci na Aruba, pues mayoria registracion cu e oficina tabata ricibi ta di compañía- y personanan di exterior. Apesar cu tabata sali publicacionnan, esaki no tabata haya mucho atencion cerca e comunidad Arubano. Na papiamento crioyo

nos por bisa: e no tabata biba bao di e comunidad. Pero poco poco pueblo a cuminsa cera conoci cu e fenomeno di registra nan marca, derecho di autor y patente. Despues cu e oficina a haya su director nobo, sr. Goswino (Gos) Oduber, a cuminsa publica mas y mas comunicado di prensa y asina duna mas informacion. Entre otro a duna varios presentacion na Camara di Comercio na interesadonan, na instancianan independiente y gruponan priva. Tambe a lansa un website unda cu tur cu ta interesa por busca e informacion cu nan tin mester y na e momento cu nan ta desea ( [www.opi-aruba.org](http://www.opi-aruba.org) ). Despues cu a lanza e campaña, "Pirateria ta ladronia" e reaccionnan cu e oficina a haya tabata numeroso. E campaña aki a sirbi pa concientiza tur esnan involvi riba e diferente terenonan cu ta regada Propiedad Intelectual. Tambe e palabracion cu a haci cu Camara di Comercio cu na momento cu un persona kier cuminsa cu un negoshi, lo ta bon pa e check cu oficina di Propiedad Intelectual pa waak si e nomber cu e kier usa, ya no ta den uso caba, sea pa un compania di exterior cu a registr'e na Aruba, of tambe e por ta registra como marca di un producto caba, cu lo haci cu bo por haya bo

cu problema cu e nomber cu bo kier usa. Tur esaki a haci cu tempo mas y mas persona local tambe a cuminsa haya e caminda pa oficina y tabata bin pa registra nan obra, nan marca y nan invento. Awe Oficina cu hopi orguyo por bisa cu mayoria Arubiano sa di e existencia di e oficina y sa kico e oficina por ofrece nan. No solamente e tin di haber cu informacion cu e oficina tabata duna, pero tambe di casonan den corte, unda cu na varios ocasion doñonan di marca tabata lanta caso contra mal uso di nan marca, of autornan tabata busca atencion di comunidad pa no cumpra CD-nan pirata. Lamentablemente cu ainda tin emisora di radio cu ta ofrece CD-nan cu cancionnan pirata na venta. Na momento cu e ley nobo di Derecho di Autor pasa den parlamento, ya esaki lo no ta posibel mas. Tambe nos kier concientiza nos usuario di internet cu downloading tambe por ta ilegal si esun cu a upload un cancion of otro obra no tabata autoriza pa upload esaki. Hasta ora cu esun cu a upload un obra literario, obra di arte of ciencia tabata autoriza pa upload esaki, pero a pone un notificacion cu e no ta duna autorizacion pa download esaki, esun cu download esaki toch por hay'e cu casonan den corte. E tereno aki di propiedad intelectual no ta uno facil, pero tur esnan cu ta interesa pa tin mas informacion riba esaki por pasa libremente na A. Lacle Blvd. 3 y busca informacion. Nos kier a felicita awe tur esnan cu ta elabora directamente of indirectamente riba e tereno aki, pero tambe na tur e empleado- y ex-empleadonan di e oficina aki. Danki pa e bon trabao durante tur e 25 añanan cu a transcuri. Nos lo sigui duna informacion na pueblo, pasobra un pueblo bon informa ta un pueblo bon educa.

## MADURO HEAVY EQUIPMENT N.V.

**Santo pa Basha, Santo pa Pleister,  
Crushed Sand, Piedra, Tera pa**

**Mata, Graniet. Tambe nos ta Rosa  
Tereno, Coba Pos y Fundeshi.**

**ROOI BOSAL 49**

**TEL.: 585-1708**

**FAX.: 585-6299**





### **EXECUTORIALE OPENBARE VERKOOP**

Op **donderdag 13 december 2012** 's middags om 14.00 uur, zal in de vergaderzaal van de "Aruba Surfside Marina", L.G. Smith Boulevard 7, Oranjestad, Aruba, ten overstaan van notaris mr M.J.C. Tromp of haar plaatsvervanger, de executoriale openbare verkoop, op grond van een beschikking van het Gerecht in Eerste Aanleg van Aruba (ex. artikel 3:174 BWA), bij opbod en daarop volgende afmijning worden gehouden van:

- een perceel eigendomsgrond, ter grootte van 607 m2, gelegen te Jacob Catstraat in Oranjestad, Aruba, kadastraal bekend als **Eerste Afdeling Sectie B nummer 363**; Inzetprijs: Afl. 100.000,--;
- een perceel eigendomsgrond, ter grootte van 609 m2, gelegen te Byronstraat in Oranjestad, Aruba, kadastraal bekend als **Eerste Afdeling Sectie B nummer 364**; Inzetprijs: Afl. 105.000,--;
- een perceel eigendomsgrond, ter grootte van 605 m2, gelegen te Jacob Catstraat in Oranjestad, Aruba, kadastraal bekend als **Eerste Afdeling Sectie B nummer 365**; Inzetprijs: Afl. 100.000,--;
- een perceel eigendomsgrond, ter grootte van 582 m2, gelegen te Bilderdijkstraat in Oranjestad, Aruba, kadastraal bekend als **Eerste Afdeling Sectie B nummer 392**; Inzetprijs: Afl. 115.000,--.

De veilcondities zullen 8 dagen voor de verkoopdatum ter inzage liggen ten kantore van voornoemde notaris.

De executant behoudt zich het recht voor, de veiling uit te stellen en op te houden zonder de verplichting de reden(en) daartoe te noemen.

Bieders dienen terstond een bankgarantie te overleggen en in het bezit te zijn van een geldig identiteitsbewijs.

Notariskantoor mr M.J.C. Tromp  
Santa Cruz 35  
Tel: 5853500/5857900  
Fax: 5854222  
Email: [info@notaristromp.com](mailto:info@notaristromp.com)/[chamilatromp@notaristromp.com](mailto:chamilatromp@notaristromp.com)

## **“Entrega di decreto gubernamental pa conmemora 30 año di servicio” di Rigoberto Tromp**



STA. CRUZ -- Dialuna 12 di November 2012 sra. G.E.M. Hassell, Hefe interino di Polis, a entrega sr. Rigoberto R. Tromp un decreto gubernamental ('landsbesluit') personalmente, den presencia di su famia y algun colega. Sr. Rigoberto R. Tromp (Chef van Dienst di Distrito di Oranjestad) a ricibi e decreto gubernamental pa e



hecho cu el'a traha 30 año na servicio di pueblo.

Despues di a ricibi su decreto gubernamental e colega tambe a hiba palabra.



**SINTONIZA**

**11:00 AM - 1:00 PM**  
**NA**

**Top95**  
95.1 FM

Interes di  
**PUEBLO**



Sin duda algun e programa di awe diasabra lo ta un programa cu lo laga un bon impresion atras. Ora cu nos ta papia di e maleza di riñon, unda cu tur siman bo tin cu bay hospital pa nan haci dialyze cu bo sanger no ta un chansa. Ya bo riñon no por haci su trabao debidamente y ta tuma dialyze. Sowieso esaki ya ta un castigo di otro mundo ariba su mes. Scucha nos y tende kico bo tin cu haci pa bo no haya e maleza

aki. E expertonan ta wardabo sin falta. Scucha nan! Den segundo tanda nos tin experto cu lo splica nos tur loke ta e molinanan di biento. Mira con Gobierno ta decidido pa establece e molinanan di biento ariba un lugar sagrado na Aruba, esta Alto Vista. E experto aki lo splica nos e detayenan di molinanan di biento. E lo bin cu sugerencianan cu kizas lo por ta decisivo pa Aruba. Pueblo keda pendiente!

## Maute Restaurant a cera, 15 hende a perde trabao!



STA. CRUZ -- Maute Restaurant na Paseo

Herencia ta pertenece na un grupo Venezolano multi - misionario kendenan ta operador di varios restaurant na Caracas Venezuela cu varios otro interes comercial na Venezuela. No ta mucho tempo cu e comerciante Venezolano aki a inverti un balente suma den un restaurant na Paseo Herencia, convirtiendo

e local den Maute Restaurante Grill. E inversion ta core di mei milyon florin. Sinembargo tabata e aña aki cu atracadornan a penetra den cas di e doño na Kamai unda un persona a keda agredi. Ambulance a presenta na sitio pa duna ayudo. Den mes siman, atracadornan a bolbe y a mara e pareha den nan cas pa asina horta varios cos bay cune. E comerciante desde e momento ey a dicidi di bandona Aruba sin waak atras. El'a cuminsa retira tur su inversion y finalmente e siman aki deurwaarder a pone beslag ariba e muebleria di e restaurant pa dje forma ey por paga parti di e debenan cu e NV a laga habri. Esaki sigur ta un capitulo scur pa Aruba, mirando cu e criminalidad a penetra te den esnan cu ta bin inverti y cu netamente ta waak Aruba como un lugar di tranquilidad. No solamente nos ta hayando golpi cu nos refineria, pero awor golpi den nos sector turistico. Na Maute Restaurant un total di 15 persona a perde trabao.



**OROCASH®**  
**CUMpra Y Bende**

**MESTER DI PLACA**

NOS TA EMPEÑA Y CUMpra ORO, SILVER,  
AUTO Y APARATONAN ELECTRONICO

✓ BO POR PAGA POCO POCO

✓ BIN Y PARTICIPA DEN GRAN RIFA DI FIN DI AÑA  
(UN SCOOTER)

**NOS TA CUMpra TUR SORTO DI ORO**

**8:00 AM a 10:00 PM**

**Telf: 582.49.89**

Av. Alo Tromp NR 2 Edif.  
Kini Kini Oranjestad, Aruba



Remetido

## Mr. Gonzalez , bo kier sigui gaña Arubianonan?



Mi no a traha cu Fly Aruba pero mi conoce den detayes su problemanan. Pa sali di duda, mi ta pidibo contesta e preguntanan aki: Si niun banco a habri cta pa Fly Aruba y abo a haci transfer di bo cuenta personal pa paga debe , con localnan por hortabo y malgasta bo placa? Empleadonan a bandona trabao of abo a mandanan cas, anto cambia slot di nan oficina? Bo ta kere cu empleadonan a lanta contra bo y a bay corte si bo a paga nan salario? Bo por corda cuanto biaha bo a confirma fecha di pago di nan salario? Bo a paga Ontvanger pa cumpli, of pabo haya bo cosnan bek y sali for di Aruba? Bo a duna Directie Luchtvaart e garantía pa haya "Economic Auth."? Bo ta kere cu Dirrectie Luchtvaart ta atende bo AOC, sin tin Economic Auth., pasobra bo no a duna e garantía existi? No ta abo mes a ordena localnan busca empleado pa tramita y logra e AOC? Bo a paga curso pa bo piloto- y mecaniconan pa haya bo AOC? Bo ta kere

cu 10 empleado ta suficiente pa 2 airbus cu 300 stoel, of esey ta pa 1 Beachcraft pa 4 pasajero? Kende a emplea e 8 hendenan pa bula priva sin cu tabata tin permit? Kende a administra Fly Aruba, localnan of Andreina, bo yiu? Bo ta kere cu bo por impresiona Directie Luchtvaart cu bo mentiranan? No ta Andreina bo yiu, cu sa menos cu bo, tabata e informante oficial di Fly Aruba pa cu Gobierno? Bo ta kere cu bo por habri cta na banco sin muestra origen di e placa? Finalmente, con bo por lanta un aerolínea sin cumpli cu leynan local, sin paga bo debenan, sin pone placa pa e proyecto y dudando di e profesionalnan cu hopi aña di experiencia cu bo tbt den bo organización????? Bo kier culpa localnan di bo fracaso pero e culpabel ta bo mes. Tabata falta solamente un detaye pa Fly Aruba logra su obhetivo y esey ta PLACA y e responsabel ta bo Mr. Gonzalez, como e único Inversionista di Fly Aruba.

## Bishita internacional na Santa Rosa



STA. CRUZ -- U l t i m a m e n t e Departamento di Agricultura, Cria y Pesca Santa Rosa ta bon bishita pa mayoria schoolnan rond Aruba. Grandi y chikito ta bin disfruta di nos Cunuco Chabelito admirando tur e bestianan cu tin aki den Santa Rosa. Di parti di Sant Rosa tur esan cu bin haci bishita ta haya un guia profesional pa asina nan conoce un poco mas di cerca kico tur santa Rosa tin di ofrece na tanto Agricultura, Cria y Pesca. Recientemente Santa Rosa tabata tin e honor di ricibi bishita di diferente Relacionista Publiconan di diferente pais bao guia di sr. Tirso Tromp cu ta Erea Director di ATA Europe. Na yegada na Santa Rosa nan a wordo ricibi pa nos colega sr. Ludwig Rasmijn kende ta e persona encarga pa duna guia na Santa Rosa. Nan a bishita na bishita crianza di Porco.

Aki ta caminda cu nan a haya un splicacion total di kico ta e trabaonan cu ta wordo haci y tambe kico ta e produccion cu ta wordo hac di parti Santa Rosa. Despues a sigui un caminata den e cunuco parti patras di Santa Rosa caminda cu nan por a aprecia terenonan planta cu tanto Hooi y tambe maishi cu ta wordo haci produci pa bestianan por come. Cria di Cabrito tambe nan a bishita pa asina mira tambe locual Santa Rosa mes ta haci pa esnan cu ta practica cria pa asina nan por disponi di bon cabrito y carnenan di bon raza. E parti caminda e produccion di lechi di cabrito ta tuma lugar tambe nan a haya un splicacion di esaki di cual nan a haya esaki sumamente interesante. Cunuco Chabelito no por a keda afor pa asina nan por a conoce esaki tambe y haya splicacion di schoolnan rond Aruba cu ta bishitando esaki

frecuentemente. Na final nan a haci un bishita na e oficina principal caminda cu sra. Nathalie Maduro directora di Departamento di Agricultura, Cria y Pesca Santa Rosa a ricibi nan cu un abrazo di bonbini caluroso. Despues cu un rato prome cu nan a haya e splicacion con e produccion di lechi di Cabrito ta tuma lugar aki na Santa Rosa nan a haya esaki pa purba di parti di nos directora. Nan a keda masha contento y sorprendi di e sabor e cu lechi Cabrito tin. Un conversacion masha ameno tabata tin pa asina por a dialoga riba diferente otro tipo cu tin di haber cu Santa Rosa. Esnan cu a bishita Santa Rosa tabata Relacionista Publico di diferente Pais cu ta Marina Noble di Germany, Valentina Tofolotto di Italia, Joanna Walding di Ucrania, Martijn Balzer di Scandinavia y Sharmin de Vries di Hulanda. Tur esaki nan ta resorta bou di ATA Europe. Di parti Santa Rosa y su directora. sra. Nathalie Maduro ta masha contento cu nan bishita y ta spera di sigui conta cu mas di bishitanan aki cual ta hopi importante pa pais Aruba. Asina henter mundo por cera conoci cu e departamento di Agricultura, Cria y Pesca y mira cu Aruba tambe ta haciendo trabaonan grandi den e sector primario.



## Diamars 20 di November FESTIVAL DI “DERECHO DI MUCHA” NA PLAYA PABAO



STA. CRUZ -- Diamars, dia 20 di November, nos ta celebra “Dia di Mucha” na Aruba. Riba e dia aki tambe ta celebra “Dia Di Derecho Di Mucha” internacionalmente. Pa e motibo aki directiva di Centro di Bario Playa Pabao ta duna reconocimiento na nos muchanan den un solo actividad na Playa Pabao. E actividad aki ta tuma lugar diamars dia 20 di November y ta cuminsa pa 3’or di atardi y lo termina pa 8’or di anochi. Nos muchanan tin oportunidad pa hunga den “waterslide”, bula riba trampolin y den dinojump, hunga den luchtkasteel, monster truck, pinta cara y participa na diferente wega. Tur esaki sin costa mayornan ni un cent preto. Muchanan ta wordo invita pa bin cu nan trahe di baño pasobra ta bay tin

un “waterslide”. Pa 6’or lo cuminsa cu un show “Di Mucha Pa Mucha”. E promer 300 mucha lo ricibi un recuerdo di e dia aki. Pues diamars dia 20 di November ta celebra Dia di Mucha y ban duna nos muchanan reconocimiento riba e dia importante aki y laga nos manera un famia grandi asisti na e actividad aki cu nos muchanan na Centro di Bario Playa Pabao. Pues mayornan nos ta warda boso y bin compaña bo yiu(nan) na e actividad aki. Lo tin un bar (sin bebida alcoholico) y un cushina cu prijsnan di dia di mucha. Un danki di curazon ta bay na Vertegenwoordig van Nederland na Aruba, CEDE-Aruba y Asociacion pa Trabao Hubenil Arubano pa nan contribucion na e actividad aki.

## Drs. Mervin Wyatt-Ras, parlamentario independiente: Apesar cu e ley pa listra paña, obhetonan y curpa di sospechosonan ta positivo den combatimento di criminalidad Mester ta cauteloso ora ta trata listra curpa di hende



STA. CRUZ -- Ora a trata e cambio di ley di “verdovende middelen” parlamentario independiente, Mervin Wyatt-Ras cu a sostene cambio di e ley aki y ta sostene trabao di nos cuerpo policial a trece padilanti cu e ley aki ta duna cuerpo policial suficiente instrumento na cuerpo political pa actua y cu awor si por ataca en especial posesión y benta di drogamas efectivo. Sra. Wyatt-Ras durante un conferencia di prensa a trece padilanti cu hopi delito di hortamento y labamento di placa tin di haber cu droga y venta di droga. Y esnan cu ta e victima no ta esnan cu ta bende e droga sino e hoben humilde

of e mama of tata humilde cu na un dado momento tur su placa ta bay den satisfase su vicio. Pesey mes ta di importancia pa combati criminalidad y crimen organiza na su raiz. Den e ley door cu ta trata listramento di curpa di hende ta di importancia pa salvaguardia derecho di cada ciudadano. Esaki basa ariba e aspecto di integridad ora ta touch curpa di hende. E parlamentario su intencion no ta pa critica cuerpo policial sino ta papia ariba esaki a base di e experiencia cu e ley aki den exterior. Otro paisnan tin un ombudsman cual ta un organo independiente unda personan por

acudi pa ser scucha ora e no ta di acuerdo cu un procedura. Nos no tin e organo aki di ombudsman. Por tuma nota cu de otro paisnan interpretacion di e ley a trece cune cu a listra hende por ser usa inadecuadamente y conduci cu ta fula hendecu otro intencion. P.e. tin casonan cu un persona uniforma trahando den security y tin hasta caso di dunador di trabao ta haci uso di su poder pa fula un persona. Alavez tambe tin casonan de cuerpo policial mes. Pa garantiza derechonan humano y preveni abuso ta importante pa e ciudadano por tin un entidad un klankbord, banda di cuerpo policial mes pa e por entrega un keho, den caso e ta sinti cu algo no a bay bon. E parlamentario independiente a propone pa bin cu un website como meldpunt y e pa explora e posibilidad pa equipa por ehempel e bureau Slachofferhulp cu medionan pa por haci e regie.

## Homber sospechoso na altura di Rey Hing Supermarket

STA. CRUZ -- Riba diahuebs na altura di Rey Hing Supermarket tin un homber cu ta actua sospechoso cu e clientenan cu ta usa e ATM. Na yegada di polis e homber a bandona e sitio caba y polis a papia cu algun testigo cu a duna descripcion di e homber. Polis a bay controla den vecindario y a logra topa e homber cu e descripcion cu e testigonan a duna. Polis a papia cu e homber cu tabata hari so. E homber tabata muestra manera cu e no a baña den basta dia y ta hopi sushi. E homber no por a bisa polis unda e ta biba

y nan a dicide pa hiba e homber na warda na San Nicolas. Polis a investiga e nomber cu e homber a dunanan y a logra haya un adres na Pos Chiquito. E bisiñanan ta reconoce e homber pero no sa na unda e ta biba precies. Mirando cu e homber no por mostra unda e ta biba y ta parce cu e tin Alzheimer, comandant a dicide pa lague keda na warda y mainta pone e instancianan concerni na altura. Mainta a tuma contacto cu SPD y Sociale Zaken y a hiba e homber cerca algun familiar.



## La Salle College den full Swing cu nos proyecto “Pa Madiki cu Amor”



STA. CRUZ -- E siman aki La Salle College a cuminsa cu e renovacion di e parke di mucha den e bario di Madiki - Kavel. Tur dia despues di school, alumno y docente ta traha na e parke. E hekki di e cura lo wordo renova, e structuranan lo wordo renova. Tambe lo snoei e matanan y haci un limpieza den e parke. Den transcurso di otro siman lo pone borchis colorido cu dicho, frasenan educativo na Papiamento, den e parke y rond di e bario. E dichonan aki ta pa re-enforza norma- y balornan den nos comunidad. Tambe lo crea un area di picnic y un area unda mucha y adulto por sinta lesa.

Ademas di e renobacion di e parke nos lo tin un dia general di limpieza den e bario di Madiki-Kavel. Dia 25 di November di 9.00-5.00 or di atardi, alumnonan di klas 3 hunto cu nan docentenan lo haci e siguiente cayanan limpi: Caya Frere Servatius, Caya Frere Caspar, Caya Frere Willibrordus, Caya Frere Gerardus, Caya Frere Ricardo, Caya Frere Norbertius y Caya Frere Fredericus. Lo tin garetia, baki di Serlimar, saco di sushi y tur material pa por haci e bario limpi. Nos ta invita pueblo di Aruba y en especial e habitantenan di Madiki - Kavel mes pa join nos den e dia di limpieza aki.

## FUNDACION LANTA PAPIAMENTO CU ANOCHI DI INFORMACION

**Ki balor enseñanza den Papiamento tin pa nos muchanan y pa nos sociedad?**

Augustus di e aña aki pa prome biaha den historia di enseñanza di Aruba e muchanan cu a drenta ‘eerste klas’ di school basico regular na e dos schoolnan piloto, Colegio Conrado Coronel y Colegio San Hose, a cuminsa siña lesa y skirbi den nan propio idioma Papiamento. Esaki ta un proceso normal na mayoria di pais na mundo: un mucha na Venezuela drenta school, e ta siña lesa y skirbi den Spaño; un mucha na Merca drenta school, e ta siña lesa y skirbi den Ingles; un mucha na Hulanda drenta school, e ta siña lesa y skirbi den Hulandes. Y ta un proceso reconoci mundialmente pa docente, científico y organonan internacional, manera UNESCO, cu ya for di aña 1953 a promulga esey. Sinembargo nos tur cu a pasa nos carera escolar of cuta pasand’e ainda, adulto y mucha, a haya nos obliga di siña lesa y skirbi den Hulandes, cu no ta e lenga di pensamento ni di comunicacion di pueblo Arubiano, kibrando asina un proceso intelectual y mental normal. Esaki ta significa cu, bon mira, e manera cu nos a pasa

of ainda ta pasando nos carera escolar no a pas’e of ta pasand’e segun un proceso normal, sino abnormal. P’esey for di fin di añanan sesenta di siglo pasa, y den cierto periodonan prome cu esey tambe, hopi hende (docente y científico) a boga pa nos muchanan haya nan siñanza den nan propio idioma, den loke ta nan lenga materno, Papiamento. Un lucha cu a dura mas di cuarenta aña, pa por a yega finalmente na un proyecto cu, den e prome fase, ta consisti di e schoolnan piloto menciona mas ariba. E dos schoolnan piloto menciona ta forma parti di un proyecto cu yama “Proyecto Scol Multilingual (PSML)” Pakico “SCOL MULTILINGUAL”? E idea ta pa e alumnonan no solamente haya nan preparacion escolar elemental, esta di siña lesa y skirbi y di siña rek, den Papiamento, sino a la bes, en bista cu Aruba ta un isla multilingual, e alumnonan ta bay siña conoce (prome) y siña (despues) e otro tres lenganan importante di Aruba, esta Hulandes, Ingles y Spaño. P’esey e proyecto aki yama Proyecto Scol Multilingual. Fundacion Lanta Papiamento

(FLP) tin como meta, entre otro: “Desaroyo di un bon maneho y planificacion di idioma na bienestar di tur sector den comunidad, di gobierno y, en especial, di enseñanza.” Patal motibo, FLP den su afan pa difundi den nos poblacion conocimiento di y tocante Papiamento y, den e caso specifico aki, di enseñanza den Papiamento, ta organizando anochinan di informacion na tur distrito pa pueblo di Aruba siña conoce mas a fondo kico ta “Scol Multilingual” y ki balor y beneficio esaki tin pa nos muchanan y nos sociedad, esta introduccion di e sistema di enseñanza multilingual. E siguiente anochi di informacion ta tuma luga diamars dia 20 di November 2012 na Teresita Center na San Nicolas. E anochi aki ta cuminsa exactamente 7:30 or. Fundacion Lanta Papiamento kier a invita pueblo di Aruba en general y di San Nicolas en especial pa asisti na e anochi di informacion aki, particularmente mayornan, maestronan di scol, Parlamentario y tur otro persona interesa. Binscuchakico ta “Scol Multilingual”.

## Homber cu muher cu problema dilanti restaurant den Playa

STA. CRUZ – Diahuebs un patruya a bay na altura di Paris Restaurant. Na e sitio polis a topa un pareha cu tin problema cu otro. Un homber tabatin un muher wanta. Polis a papia cu e muher y el’a declara cu e homber ta molesti’e. E homber

a splica cu nan ta pareha y e muher no kier papia cu ne. Polis a atende e homber cu e no por tene e muher contra di su voluntad. Y nan no por soluciona nan problema riba caminda publico.



Kiwanis Club of Young Professionals Aruba na Palm Beach:

# Trick or Treat event pa muchanan di Imeldahof Plaza, un Halloween Treat



STA. CRUZ -- Den cuadro di celebracion di Halloween, Kiwanis Club of Young Professionals Aruba (KYPA) a organisa algo special pa e muchanan di Imeldahof. Den e weekend di 26, 27 y 28 di Oktober a organisa un Trick or Treat na Palm Beach Plaza. Diabierna miembro di KYPA a bay Imeldahof pa yuda e muchanan decora t-shirts pa nan bisti ora di Trick or Treat. E siguiente dia despues di un treat di pizza e grupo a wordo hiba Palm Beach Plaza unda nan a pasa tienda pa tienda y colecta mangel. Tambe a hiba e muchanan e Circo Rolan pa asina nan por a goza di un tremendo weekend. E evento aki tabata e prome di e Big Brother Big Sister program unda adulto jong ehemplar ta duna man pa yuda muchanan cu menos recurso. Dieziete miembro di KYPA a pasa tempo cu Diezcuatro mucha di Imeldahof. Por a nota con e muchanan a goza di e weekend special aki y ta pa e motibo aki KYPA ta organisa tipo di evento asina. KYPA kier a gradicinos sponsornan: Palm Beach Plaza, Maggy's, Amito y Balashi cua yuda haci e celebracion de Halloween aki un exito. Pa mas informacion tocante KYPA por bishita: <https://www.facebook.com/KiwanisYPAruba>





# Fietstocht pa celebra den famia "Dia Internacional di Derechonan di Mucha"

## Grupo San Dominico Noord

**Diasabra 24 di November saliendo 9.00 di mainta for di St. Aloysius School**

STA. CRUZ -- Diamars awor 20 di November ta: "Dia Internacional di Derecho di mucha" y pa celebra esaki e Grupo San Dominico Noord (GSDN) cu ta den preparacion pa participa na Cuboree 2013 na Surinam ta organiza un fietstocht pa tur e muchanan bin celebra hunto cu na famia, estimulando asina recreacion den famia. E fietstocht aki ta tuma lugar diasabra 24 di November saliendo y regresando St. Aloysius School, den cura di Misa Sta. Anna na Noord. E ta un actividad pidi door di nos muchanan pa laga tur mucha sinti nan "special" ariba caminda den compania



di nan mayornan y asina celebra nan dia: "Dia internacional di mucha". Participacion ta AFL 5.00 pa persona y por registra diasabra 17 di November for fi 9.00 di mainta te cu 4.00 di atardi. Tambe Diarazon 21 di November di 5.00 pa 9.00 pm na St. Aloysius School. Diasabra 24 di November ta cuminsa



registra pa 8.00 am na St. Aloysius School y e fietstocht lo sali 9.00 am rumbo di Boegoeroei, na crusada di Shaba ta bira bay direccion di Bubali cu un post di awa pariba di Bubali Commercial Center. Sigui direccion di Washington cu e ultimo post di sosiego Veld di National. Sigui bay Noord den Palm Beach bira pa



drenta Semeleerstraat, subi caminda grandi pasa luz di trafico pa termina na St. Aloysius School rond di 12'or di merdia. Participacion ta AFL 5.00. Nos lo tin awa, juice, fruta, donuts pa tur mucha. Si tin comerciante cu ta desea di contribui y haci uso di e oportunidad pa regala nos muchanan un regalito ariba nan dia

y contribui cu GSDN su meta pa participa na Cuboree 2013, esaki ta mas cu bon bini. Si no alcanza pa pasa registra ariba e dianan cu nos lo tin registracion, por registra tambe via e siguiente personanan: Akela Sharlyn Tromp-Farro, GL di grupo San Dominico Noord na 593-0834 of shatrofa@setarnet.aw, Chikai Rudolfo Angela na 564-4324 tambe cerca sra. Charmain Alberts na 566-1732 of por cumpra ticket cerca nos miembronan di grupo.

Tur mucha hunto cu nan mayornan ta bon bini pa celebra "Dia Internacional di Derecho di mucha" Noord.

## Comision di Subsidio ta recorda federacionnan riba deadline pa entrega peticion



STA. CRUZ -- Recientemente Comision di Subsidio a tene un anochi informativo den cual a splica na tur federacion deportivo e reglanan pa peticion di subsidio. Durante di anochi aki tambe a anuncia cu peticionnan pa subsidio mester wordo entrega dia 15 di November.

Mirando cu ta 15 federacion so a entrega nan peticion oficial. Comision di Subsidio ta duna algun dia extra pa esnan cu no a logra traha riba nan peticion por haci esaki ainda. E deadline pa entrega di peticion ta bira awor diaranson 21 di November proximo. Cu e extension di un siman aki,

Comision di Subsidio ta spera di por ricibi mas peticion. E federacionnan cu ya caba a pidi extension di tempo pa entrega nan peticion ta wordo teni na cuenta.

Federacionnan mester tene cuenta cu si e peticion pa subsidio no wordo entrega na e fecha stipula Comision di Subsidio no por garantisa aprobacion di e peticionnan. Esaki seguramente ta un lastima ya cu falta di fondo ta perhudica deportistanan y e deporte cu cada federacion ta representa.

Comision di subsidio ta spera di por conta cu un participacion di 100% di tur nos federacionnan deportivo.





# SUCESO AWE24.COM

**Saliendo for di Mc Donald's Palm Beach**

**Dama a bay wanta refresco y a perde control dal 2 auto staciona den parkinglot**



STA. CRUZ -- Diahuebs atardi a drenta informe di un accidente na Mc.Donald's Palm Beach, mesora a dirigi un patruya na e sitio.

Na yegada di e patruya a bin compronde cu un dama chauffeur cu a caba di sali for di e fastfood a nota cu un refresco a bay plama den e BMW y pa e no plama hopi el'a rek bay gare pero esaki a pone perde control riba e auto y a bay dal 2 auto di huur di turista cu tabata staciona den e parkinglot.

Afortunadamente ningun hende a resulta herida

**Alarma di oficina di Oduber Agencies a core cu ladron**



STA. CRUZ -- Diabierna maduga a drenta informacion cu e alarma di oficina di Oduber Agencies na Long Fellowstraat a bay on, mesora a dirigi un patruya na e sitio. Na yegada di e patruya a bin constata cu tabata tin un bentana habri y

e alarma tabata zona. Ademá a nota tambe cu e antisocial a purba forza un kozijn di un porta patras pero no a logra. Na yegada di e gerencia a bin nota cu e ladronnan no a logra bay cu nada y cu probablemente ta e alarma a core cu e ladron.



# SUCESO AWE24.COM

## Polis a purba persigui agresor pero esaki a logra despista polis banda di Elmar Hato



STA. CRUZ -- Diarazon anochi a drenta informe

di un pelea cu arma na Compleho Deportivo Frans Figaroa, mesora a dirigi un patruya na e sitio. Na yegada di e patruya a bin compronde cu e agresor a caba di bandona e sitio. Un di e 2 patruyanan a bay dibiaha su tras pero a perde for di bista banda di Elmar Hato bay noord. E otro partido a duna informacion di esun cu a core bay. Polis a pasa e informacion aki pa recherche y a conseha e victima pa bay na warda



di Shaba entrega un keho na recherche



## Aruba International Beach Tennis ta powered by SETAR



STA. CRUZ -- E asina anticipa International Beach Tennis Aruba Event ta conta cu no menos di 600 participante e aña aki.

E participantenan ta bin di diferente parti di mundo manera: Aruba, Brazil, Belgica, Bermuda, Canada, Colombia, Francia, Venezuela,

Merca, Italia, St Martin, Martinique, Mexico, Czech Republik, Hulanda, Puerto Rico y Alemania. E deporte di Beach Tennis ta existi 10 aña na Aruba y

e deporte aki a sa di hala masha hopi atencion mes bao di nos hendenan di Aruba den ultimo añanan.

Actualmente tin 500 hungando activo cu ta practica e deporte aki semanalmente na e club di BTA ( BeachTennis Aruba). Recientemente BTA (Beach Tennis Aruba) a habri 8 cancha nobo banda di Holiday Inn Hotel.

E weekend aki Aruba ta den spotlight internacional y ta orguyoso di por ta anfitrión pa di 3 aña di e competencia di Beach Tennis mas grandi di Caribe.

SETAR NV ta provee e

evento aki cu WIFI na beach caminda cu tur participante y bishitante por disfruta di Internet riba nan telefon of tablet. SETAR NV ta contento di por sponsor un evenemento internacional di caliber y asina tambe

SETAR NV ta contribui na e crecimiento di un deporte hunga den aire liber riba nos beachnan y hopi gusta na Aruba.

SETAR NV ta yama bonbini na tur participante internacional cu ta di bishitana nos Isla y ta desea e participantenan di Aruba hopi exito.







# Aruba Softball Bond cu un Reunion Extraordinario 11 di December proximo

STA. CRUZ -- Aruba Softball Bond no a para keto y ta continua cu desaroyo y progresonan pa cu e deporte di softball. Despues di un bunita campeonato cual por cierto a caba di termina e di dos siman di November ASB ta continua cu un invitacion na tur equipo miembro, umpires, scorers pa un Reunion Extraordinario cual lo tuma lugar 11 di December proximo. Esencia di esaki separa cu Directiva kier duna y comparti desaroyonan riba plataforma internacional tambe ASB kier evalua campeonato 2012 den conhuntro cu tur su miembronan y asina notula tur posibel recomendacion pa asina hunto sigui ahusta tur

posibel deseo pa cu proximo campeonato. ASB lo haci un invitacion na Baseball (ABBA) pa un reunion promer cu e fecha aki y lo trata na yega na season pa cada deporte, esta Baseball y Softball. Tambe lo duna informacion riba posibel competencianan internacional unda tanto seleccion Masculino y Seleccion Femenino lo por bay competi pero mas cu claro lo keda inespera di decision final di Minister di Deporte pa mira cual ta e seleccion(nan) cu lo ricibi aporte pa cu 2013. ASB ta invita tur su miembronan pa tene e fecha aki liber y dentro di poco boso lo ricibi un invitacion formal. Softball den pleno desaroyo.

**Resultado Campeonato dobel AA 2012**

Wega nr.	game 3
Fecha	15-11-2012
Stadion	C.M.D.C

**Box score**

Team	1	2	3	4	5	6	7	8	9	10	R	H	E
V QCC SLUGGERS	0	0	2	0	0	1	0	2	1		6	13	2
H Indians	1	0	0	0	0	0	0	0	1		2	5	4

**Pitcheo**

Pitcher Ganado	Sandy Roca
Pitcher Perdido	Christian Dhas
Wega Salba	

**Nota:**

**Bateo:**

Miho bateado (nan)	Team	
Deyan Peterson	Sluggers	5-3
Angelo Arnold	Sluggers	4-3
Edgardo Lacer	Sluggers	4-2
Joshua Ramada	Indians	3-1
Eldrick Dyckhoff	Indians	3-1

**Oficialnan:**

Number	Posicion
1. Falcon	Plate Umpire
2. Rocio Givell	Base Umpire
3. Benich Leande	Base Umpire
4. Sergio Lamer	Scorer
5. Ricki Geerman	Miembro na warda
6. Aubrey Maduro	3B Umpire



## LAST Movie Night in the Park FOR 2012

Arikok National Park will be showing the BBC documentary "Life". Come and join us with your family for a night of film, food and fun.

Double episodes: - Hunters and Hunted  
- Creatures of the deep

Date: 24 November  
Time: 19:00 - 21:30  
Location: Visitor Center  
Admission: **FREE**

## Movies In the Park

for more information call: 5851234



# UNION Gaitero 2012

## UN SOLO ESENARIO, UN SOLO ANOCHI!

### 5 AÑA TRAHANDO PA NOS GRUPONAN DI GAITA LOCAL!



**8000,- FLORIN  
NA PREMIO  
CASH!**

1. Swing Gaitero
2. Gaita Sensacionales
3. Los Paranderos
4. Gaita Autentico
5. Gaita Talento
6. Sparkle
7. Katatumbo
8. Gaita Pasa Palo

**Lugar: Sportboys na St. Cruz**  
**Fecha: 7 di December 2012**  
**Orario: 6:00 pm - 2:00 am**  
**Entrada: 5,- florin**  
**Doorprize: Comfortmax Inverter 12000 BTU**


















# Playoff HEINEKEN di Aruba Softball Bond ta termina

## Quisqueya CAMPEON di A-Klasrumbo pa Doble-A

STA. CRUZ -- Playoff HEINEKEN di Aruba Softball Bond dedica na Milburga "Mila" Martinus y Antonio "Tony" Warner a termina pa categoria di A-Klas momento cu Quisqueya un miembro nobo di Aruba Softball Bond kendenan a afilia e aña aki na ASB a "SWEEP" BB Piratas den e gran final ganando e serie di best out of five, 3-0. Den e promer encuanto siman pasa Quisqueya a gana BB Piratas den extra inning 14-13. Den di dos partido Quisqueya ta bolbe gana BB Piratas e biaha aki cu score di 9-8. Den nan di tres encuentro Quisqueya finalmente ta gana un biaha mas cu score un di 9-8 y ta subi tereno pa celebra nan titulo di campeon bon mereci. BB Piratas a haci falta di nan astro pitcher kende alavez tabata champion pitcher di campeonato cu 5 gana y 0 perdi, esta Joy Orman kende a opera su pia net promer cu playoff. Sinembargo Quisqueya semper a lucha y bringa pa su titulo cu alma y cuerpo. Quisqueya di acuerdo cu reglamento lo wordo promovi



automaticamente pa A-Klas pa cu campeonato 2013. Fernando Cuevas e capitan di e equipo no por a contene su lagrimanan di alegria. BB Piratas pa di dos aña consecutivo ta hungando playoff final pero e suerte no kier cay na nan banda. Equiponan di AA ta yama Quisqueya un bon bini, deseando nan tur clase di exito pa cu e otro temporada. Quisqueya 9 careda, 10 hit, 1 error. BB Piratas 8 careda, 8 hit, 3 error. Roberto Schwengle ta drenta releva Candito Arias den di 4 entrada y ta resulta pitcher ganador. Roberto Schwengle ta bira MVP di playoff tambe cargando su equipo door di henter e

serie. Frenel "Chebele" Bernardus kende a drenta releva Hector Capellan den di 4 inning ta bay cas cu e derota riba su number. Robert Peterson di Quisqueya ta titula Champion homerun cu 3 cuadrangular mientras Lynell Koolman di MIO Athletics ta bira Champion batter bateando 20-12 bon pa un averahe di 600. Mihor bateadornan pa Quisqueya ta Randy Cordero Paredes y Albertico Noguera ambos di 2-1, Jeuris Manuel Rollock 3-2, Candito Arias kende tabata e pitcher habridor a bay di 3-3 aportando grandemente na su propio causa. Pa BB

Piratas a sobresali na plato Modesto de La Cruz 3-2, Lenin Ashby di 4-2 y William Benitez Mota di 2-1. Aruba Softball Bond por mira atras riba un tremendo temporada den 3 diferente categoria. Liga Flamboyant esta AA femenino Campeon Aruba bank Lady Tigers y sub campeon Jaguars Nesbitt's. AA Masculino Liga Kibrahacha Campeon Royal Power y sub campeon Montaña Huan Zhan. A-Klas Liga Kwihi CAMPEON QUISQUEYA y Sub Campeon BB Piratas. ASB kier felicita tur e

equiponan, Atletanan, Umpires y Scorers, directivanan y doñonan di tereno, Subsidie Commissie, miembronan di directiva di ASB, fanaticada y sigur miembronan di prensa y HEINEKEN pa nan aporte kendenan den conhuntito a logra haci campeonato di ASB 2012 un exito rotundo. Universal Trophy lo hunga pronto un serie di 3 wega contra BB Piratas pa waak kende ta keda of subi AA. Pabien Softball!!! Pabien Aruba!!!!



### ALEJANDRO TEY BEK

Pa tur mi clientenan di Sta. Cruz y vecindario, ami Alejandro Duque tey bek na Sta. Cruz 32c, Point Plaza dilanti di Colegio San Jose. Pa mas informacion por yama na 585-0395 of 568-1467 of por pasa personalmente. Danki, Alejandro.



# Indian Rock Garden

*awor den su estilo nobo..*

pa bo

*Christmas Dinner*

*bruid, aniversario of  
cualquier otro celebracion...*

Jama 5926460

y haci bo reservacion



# KENRO SBT CAMPEON TORNEO ASTROS SBT 2012



STA. CRUZ -- Despues di tres siman di weganan di e torneo organiza pa Astros SBT, diadomingo ultimo e final a tuma lugar entre Bambino Sluggers y Kenro SBT. E prome clasificado esta Kenro ,Campeon Arubano 2012-2013, a clasifica facilmente pa final. Kenro a derota Old Parr 16 pa 0 ( black-out) , Kibaima 12 pa 5 finalmente Budlight 7 pa 1. Di otro banda Bambino Sluggers tambe a yega final ganando e wega clave for di Aruba Jrs cu e score di 12 pa 5. Pues den final Kenro vs Bambino Sluggers. Tras un picheo hermetico di Willy Croes ,un tremendo

defensiva y un ofensiva barbaro di 20 hit di cual 2 homerun. Kenro a propina Bambino Sluggers un knock-out fulminante di 19 pa 0. Mihor bateadornan tabata e propio Willy Croes di 2-2 y Greg Manuel di 1-1. Elton Wilson y Richard Betrian a conecta di home-run. Asina tambe Kenro a agrega otro titulo e aña, akinan e racha di victorianan durante 2012. Den e wega pa di cuater y tercer lugar San Nicolas Movers a sa di gana di Warawara Classic y asina a caba na di tres lugar. Pabien na e ganadornan.



## HABRIENDO PRONTO

PRONTO:  
APERTURA:  
JOHN'S LUNCH TRUCK  
HABRI DEN PARKING PLACE

DI CODEMSA NA CUMANA.  
ORARIO : 11'OR AM PA 2.30 PM.

CELL : [5648014](tel:5648014).

PLATONAN SALUDABEL.



CHRISTMAS LUNCH/DINNER:

ENTREE: EGGROLL

MAIN COURSE: SLICED TURKEY, BREAST DEN PINEAPPLE-ORANGE, SAUS, BUFFET HAM DEN SWEET & SOUR SAUS LOMITO DEN MUSHROOM SAUS , AROOS PRIMAVERA SALADA

DESSERT : CHEESE CAKE PRIJS: FL 45,00 P.P. MIN. PERSONA: 50.

*John's Party Place*

*Piedra Plat 85B*

*Cell; 737-0042*





# Hakeem Lowe di Brazil Taekwondo Stichting a sali best fighter na e Banco di Caribe Taekwondo Cup



STA. CRUZ -- Hakeem Lowe di Brazil Taekwondo Stichting a sali best fighter na e di cuater Banco di Caribe Taekwondo Cup. E team di Brazil Taekwondo Stichting di Train Hard Fight Smart ta funcionando bon bon.

Tiger Taekwondo Academy a organiza pa e di cuater biaha e Banco di Caribe Taekwondo Cup y Brazil Taekwondo Stichting a participa cu 10 atleta na unda cu esakinan mester a demonstra e lema cu nan ta forma parti di dje, pero parce cu Hakeem Lowe so a capta esaki te ainda. Hakeem Lowe for di diabierna atardi ora di pisa no tabata tin contrincante pe den su categoria. E ora a dicidi di

challenge Ishaq Lake di San Nicolaas Taekwondo Center kende tin 12 aña y ta un cabez mas grandi cu Hakeem Lowe, pero esaki no a wanta Hakeem Lowe di purba su suerta contra di Ishaq Lake.

For di e momento cu e referee a start e pelea Hakeem Lowe a ranca start y ataca Ishaq Lake. E publico presente tambe a bin mas cerca pa admira e pelea aki, pasobra niun hende no tabata sa kico pa spera mirando cu Ishaq Lake tin mas aña ta practicando Taekwondo. No a dura mucho tempo pa Hakeem Lowe a los e helicopter ariba Ishaq Lake. Aki ta unda cu cos a bira mas cayente na unda cu Ishaq Lake a cumenza

wanta Hakeem Lowe, pero ya tabata laat, pasobra Hakeem Lowe a haya e confianza caba cu e lo a gana su pelea.

E coach di Brazil Taekwondo Stichting Robert Giel a keda masha

contento cu un otro meta logra di Hakeem Lowe kende ta briyando na Aruba y Internacional e aña aki. Un pabien grandi ta bay na Hakeem Lowe di Brazil Taekwondo Stichting kende a sali

best fighter. Tambe un pabien ta bay na Jurney Tromp, Fausha Hazelhoef, Chiara Petrocchi, Lionel Fransisca y Diamo Ruiz kendenan tambe a sali best fighters den nan categoria.

## RACQUETEERS SBT A SALI PA INTERCAMBIO DEPORTIVO NA ORLANDO FLORIDA



STA. CRUZ -- Diarazon atardi a sali pa Orlando e equipo di softball Racqueteers na unda nan lo realisa 4 partido. E equipo ta bao maneho di sr Hose. Racqueteers hunto cu sra Bartels Daal, Saraquita y otronan mas a presenta

durante Internacional Film Festival 2012 na Herencia Paseo y a sali publica tambe den Softball Magazine. Aaron Hose, bibando na Merca, a forma parti di e comision y a percura pa propaga Aruba su number. Nan lo ta huesped di Senior

Moments cu participacion tambe di Golden Knights y lo regresa diadomingo. Diabierna lo tin un double header; diasabra 1 wega y diadomingo un wega mixto. Hopi suerte na e torneo aki.



Show di Piet Blo Blo.. Desde November 26



# Decklin Happy Birthday!!!!



Awe nos ta canta Hiep hiep hoerraaaaa pasobra awe ta cumpli 11 aña **Decklin Theysen**. E ta haya hopi pabien di parti su mayornan, rumannan Jaim Jo y François. Tambe pabien di su Omanan y Opanan. Hopi pabien special di su Tia Sas y primanan Analyse y Sabina na Alemania. Decklin cu bo tin un dushi dia!

## Awe a cumpli 77 "Ricardo Geerman"



Awe den oracion nos kier gradici Dios pa a regala nos un Tata ehemplar, Ricardo Geerman, un Tata cu a sacrifica tur cos pa a lanta su yiunan, un Tata cu tabata hopi streng cu nos pero almismo tempo a duna nos hopi amor, un Tata cu semper ta

preocupa pa nos, un Tata cu apesar cu cada un di nos tin nos mes un bida, tog tur dia ta puntra nos, mi yiunan conta awe? Papa danki pa ta nos Tata y danki di a duna nos tur locual cu Papa por a alcanza, awe nos tur hunto yena di hopi alegria kier a felicita Papa ariba Papa su dia. Hopi Pabien Papa, cu Dios drama bendicion na abundancia y permiti Papa cumpli hopi aña mas hunto cu nos Papa su tesoronan. Hopi pabien di parti Papa su Casa Carmen Geerman cu ta stima Papa un mundo, yiunan: Ludwina, Marianela y Lourdes, nueronan: Hans, Chupi y Bryan, di 13 nietonan, 9 bisanietonan, su rumannan, sobrino y sobrinanan y demas famia. Nos tur ta desea pa cu Papa pasa un super

dushi dia awe.



## Felicitacion (Recordar es vivir)



Awe diasabra Martin ta recorda cu 50 aña pasa el a conoce su pareha masha stima Gina.

Na un edad hopi hoben pa promer biaha riba 17 November 1962 e la conoce su amor na prome bista.

E ta felicite y jame danki cu ya pa 43 aña caba ta navegando hunto, compartiendo e barco matrimonial fielmente bou inspiración di Dios Spiritu Santu, bao intercesión di La Birgen Maria cu proteccion di San Miguel Arcangel. Ta pidi Dios Todopoderoso hopi bendicion pa hopi aña mas di bida y salud hunto.



Two pleasure we will always enjoy:  
Sipping a great cup of freshly brewed coffee  
And

Remembrances of things past  
Let's celebrate the best by giving in to  
Life's grand passion: coffee drinking  
Come visit us and you will be amazed  
Sandwiches - baquettes - wraps - hot panini's  
Salads - soups - cookies & cakes  
Eat in or take out  
Good honest food made with  
the best quality ingredients

**NOW  
OPEN**

### Opening hours

Mon - fri 6.30 am - 2.00 pm  
4.00 pm - 8.00 pm  
Sat. 7.00 am - 7.00 pm  
Sun. 8.00 am - 2.00 pm

Noord 82-a  
Telephone 586-9445





## FOR HUUR

Un apartament di 1  
kamber y un baño  
comodo den centro di  
Santa Cruz, Preferibel  
pa un pareha of  
un persona, serio y  
responsabel. 7 pa  
mas info yama  
593-1449/593-8998.

## Oportunidad

Oportunidad pa inverti  
ta bende un complejo di  
apartamento na Noord.

Yama cel: no 593-7118

## TA BUSCA

Ta bende tereno Prime Spot  
na Sta Cruz pa supermarket  
of negoshi.  
Tereno Eigendom.

1. 600m2 @ 250 florin per  
m2, situa pariba di dokter de  
Cuba na Sta. Cruz
2. 600m2 @ 250 florin per  
m2, situa pariba di  
Dokter De Cuba na Sta. Cruz
3. 800m2 @ 500 florin per  
m2, Situa otro banda di Taco  
Bell na Sta. Cruz,  
ariba caminda grandi.  
Contact Ecro na 730-7000

# CLASIFICADO

**solodipueblo@gmail.com**



## Medical & Home Healthcare Services

Av. Milo Croes 52, Dakota - Aruba

Tel. 582 6651 / Fax 582 6567

## BUSCA TUR BO PRODUCTIONAN DIABETICO

Manera:

Diabetic Hand, Elbow & Knee Lotion  
Diabetic Face Care  
Diabetic Nail & Finger Cream  
Diabetic Foot Massage Cream  
Diabetic Key Chain (Jabero)  
Diabetic Bracelet and Necklace (Armband i Cadena)  
Special Medical Diabetic Shoes  
Glucio Perfect (Machine pa test sucu den sanger.)

**Labco Medical**  
lider den productionan  
Diabetico na Aruba



Paradera 84, tel: 297 582 1164, cell: 297 593 1189, fax: 297 588 0109

Boutique Keyla tin un coleccion grandi di paña  
pa diferente ocasion den size small te cu 3XL.

Nos ta habri di dialuna pa diasabra, di 9.00  
AM pa 6.30 PM

Nos tin un parkeerplaats amplio.

Boutique Keyla

Paradera 84

tel: 582-1164 cel: 593-1189

website: boutiquekeyla.com

facebook: Boutique Keyla



## Private Center Investigation Aruba

1. Nos ta un compania Arubiano
2. Nos ta investiga tur cos cu bo por duda  
aden?

1. caso di divorcio
2. caso di maltrato
3. caso di duda aden???

4. caso di corrupcion
5. caso di ladroncia
6. caso di atraco
7. nos ta filma tambe videonan
8. nos ta graba tape di combersacionnan
9. nos ta rond mundo completo den e trabou aki
10. nos ta traha rapport tambe di tur clase
11. nos ta keda den nos sistema priva
12. nos ta saca potret tambe
13. abogadonan por contact nos tambe pa facilita nan  
trabao tambe



**Yama nos na tel: 5684160**  
**24 ora pa dia**

## TRANSPORTE SION N.V.

Transportando Seguridad y Confianza!

*Jose A. Martis*  
DIRECTOR

Oranjestad, Aruba  
Tel: (297) 747-3004  
(297) 563-5403

E-mail: sionaruba@hotmail.com

tion aruba

Con acceso gratis a internet, dentro del vehiculo



## TA BUSCA

Santa Cruz Bar ta busca  
un mucha muher amable  
pa traha.

Pa mas informacion  
yama 593-3618 of  
585-8088

## TA BUSCA

Ta busca pa cumpra y  
na bon prijs:

- machine di popcorn
  - machine di suco
- Yama: 567-9696

## FOR SALE

Ta bende tereno di 622  
m2 eigendomsgrond na  
Sta. Cruz, situa poco pa  
bao di oficina di MEP na  
Sta. Cruz  
Contact ECRO na  
730-7000

## TRABAO?

Bo ta buscando trabao?  
E espacio aki por ta di bo.  
Manda nos bo anuncio di  
bo specialidad of bo ramo  
di trabao cu bo number di  
contacto.  
585-9500

## TA BENDE

Un apartament  
complex na Cunuco  
Abao, completamente  
cla! Ta consisti di 3  
apartamento di cual  
cada un tin 2 kamber,  
baño, sala, cushina.  
Situa 3 minuut di La  
Cabana y 4 minuut di  
Westin Hotel. Asking  
price:

Afl. 400.000,00. Pa  
informacion

yama ECRO - 730-7000

## TA FURA

### Orange Matras Fabric

ta fura y traha matras y box  
spring den tur midi, ta fura  
set di sala, tv chair y pa auto  
pa mas info bishita nos  
olijfistraat 23d of por jama na  
588-7468 / 569-8053.

## TA OFRECE

Ta ofrece servicio di divorcio, ta  
traha carta(nan) na hulandes,  
spaño y ingles na un prijs  
razonabel.

Pa mas informashon, por manda  
email na: easylegalc@yahoo.com

## TA HUUR

Apartamento na  
Noord, Cunuco  
Abao, banda di  
Texaco Sasaki 2  
kamber separa,  
sala, cushina,  
comedor,  
1 baño

Apartamento ta  
completamente  
muebla; cama  
kingsize, mesa di  
comedor, set di  
sala, frigidaire.  
Ta inclui 2 airco tipo  
inverto (pa spaar  
coriente) Exclusief  
cuenta di coriente y  
awa Afl. 1200.00  
per maand  
1 luna  
downpayment  
plus 1 luna paga  
adelanta  
Contact Ecro Real  
Estate na 739-0101

## TA BENDE



Un generator  
Denyo di 15 KVA  
aribasugaroshi  
cu wiel. Ta start  
y traha den  
perfecto condicion.  
Afl. 16.000.00  
negociabel.  
Haci bo oferta.

Call: 739-0101



# Fundacion Desaroyo Educativo Comunitario



- Entre:**
- Diasabra 27 di okt. na Colegio Pastoor Kranwinkel, Paradera.
  - Diabierna 2 di nov. na Colegio San Agustin, San Nicolas.
  - Diahuebs 8 di nov. na Aloysius School, Noord.
  - Diaranson 14 di nov. na Colegio Sagrado Curason, Savaneta.
  - Diamars 20 di nov. na EPB, na St. Cruz.
  - Dialuna 26 di nov. na Scol Paso pa Futuro, Playa.
- 2.30 y 6'or di atardi.**



## TA BENDE

Dos Cabay un paso fino y un di paseo bon pa mucha di 5 aña bay ariba Afl. 1500,00 y Afl. 700,00. Pa mas info yama 594-4953 of 594-1317

## TA BENDE

1 flat boat 19.5" kil dek 22.8 lata full cla bay awa. Por papia over di e prijs

Tel : 5683970  
Sta. Cruz.

## TA BENDE

Un cas nobo, 3 kamer, 2 baño, sala, comedor/ cushina riba tereno propiedad ( eigendom) di 355 m2 den un bario hopi trankil, den naturaleza, riba un residencia situa na Papon (Sta.Cruz) prijs afl 192.000,= pa mas info yama 744-0922.

## Telefonnan importante:

### BOTICANAN:

Maria	585-8145
Di Servicio Noord	586-4606
Seroe Preto	584-4833
Fergusonstraat	583-0620
Kibrahacha NV	582-2007
Oduber NV	582-1780
Paradera	588-6638
Santa Cruz	585-6890
San Lucas	584-4830
San Nicolas	584-5712
Santa Anna	586-0027
Trupiaal	582-8671
Eagle	587-9011
4 Centro Medico	584-5779
Aloe	584-4606
Central NV	585-1965
Dakota NV	588-7364
Del Pueblo	582-1253

### POLIS:

Oranjestad	100
San Nicolas	104
Sta. Cruz	105
Noord	107
Tip-line	11141
Brandweer/Ambulance	911
Guardacosta	913
Seguridad National	11911
Hospital	527-4000
Centro Medico	524-8833
Setar storing	117
Web Storing	525-4600
Elmar storing	523-7147

### Agencia Funeral:

The Olive Tree	584-8888
Ad Patres	584-2299
Aurora	588-6699
Mementomori	582-2222

### Fundacion:

Cas	584-2050
Fada	583-2999
F A V I	582-5051
Famia Planea	588-9591
Autismo Aruba	588-1179
Pa Hende Muherr	583-5400
Pa Hubentud	588-6138
Bloedbank Aruba	587-4260
Solo di Pueblo	585-9500
Canal 22	585-9500
Tip pa redaccion	592-6895



## Sorteo di dia : 16 November

Santo Domingo	Diario	Curaçao	Super 4	Lot / Cat	Big 4
	2021	6560	5799	2123	6979
	7646	1355		3089	
	6742	2338		3442	
Lotto	22 - 19 - 09 - 24 - 04				
Mini Mega	17 - 26 - 04 - 11				
Mega Ball	12				
Zodiac	7512 Aries				

## Dokter y Botica na Warda pa bao di Brug:

Yama pa informacion na Horacio Oduber Hospital: 527-4000

## Dokter y Botica na Warda pa riba di Brug:

Yama na Centro Medico  
524-8833



# NOTICIANAN INTERNACIONAL

## PRESIDENT DI EGIPTO NO A BAY NA E PAPA COPTO

Cairo – E president di Egipto Mohammed Mursi ta bay na e ceremoniacopto cu cual e iglesia cristianantiguoaki ta inicia un Papa nobo. Mursi ta mandaunenviadona Sint Marcus Cathedral den e barrio Abbasiya den nordeste di Cairo. Eynan e Papa Tawadros II lo serinicia. E ta dirigi e comunidad mayor cristian den Medio Oriente. Segun ta calcula 8 te 10 porciento di e 83 milyon Egipcianan ta cristiannanegipcio Orthodox cu ta sercoptonan. E origen di e iglesia ta serremontana San Marco mes, un di e cuatrevangelistanan den e Testament Nobo di Beibel. Mas temprane musulman conservative Mursi a parse di a presencia e ceremoniaeclasiastico. No ta conocipakico el a hayestroba.



## GRAN MANIFESTACION CONTRA ABDULLAH II NA AMMAN



Amman – Alrededor di 10.000 manifestante den e capital di Jordania, diabierna aexigi e salida di e rey Abdullah II. Libertad, libertad, caba cu Abdullah, e manifestantenantabatagrita, kendenan a reuni pa protesta contra e aumento di prijs. E public tabatavaria den sucomposicion y tabatinislamista, activistahoben liberal y miembronan di e partido di oposicionizquierdo. E manifestantenan a lantainusualmenteferozmente contra e monarcocasi absolute reinante: "Abdullah reforma of desaparece, bo a perdebolegitimidad, Abdullah bo tempo a pasa". Polis antidisturbo a logramantene e manifestantennanleu di e palacio real, sin cu tabatinirregularidad. Frecuentementesa tin protestanannaJordaniapero ta inusual cu ta reacciona contra e rey. Tambe tin uncastigo di prison pa insulta e rey. Abdullah II a cancelaunbishita cu e lo a haci den transcurso di e simanvenideronaInglaterra.

## PASADO SCUR DI GUERA NA NORUEGA ILUMINA

Oslo – Noruega ta serconfronta cu unpagina scurtocante camponan di concentracion den propiopaís durante e Segundo Guerra Mundial. Mas di 4000 presonan politico di Yugoslavia a serarastra pa e país dii Scandinavia y empleabou di condicionnanhoribel. Varios a serasesina, a menudo dor di accionnan di asesino di guardiananNoruego. E existencia di e camponan SS den propiopaístan unfenomenopococonociden Noruega. Den e decadadespues di guerra no tabataconvineitne pa establec cu Noruegonantambepor a ehecutaactonnanhoribel, professor Nils Christie a declara, e falta di corahe cu te cu awe ainda no poradmiti e existencia di camponan y e uso di Noruegonancomoguardianan. E tabataprobablementedemasiadodificil pa compronde cu algoasinapor a sosodeakinantambe. E centroNarvik pa documentacion di guerra tin sin embargo expedientenan extensor tocantecincocamponan pa presonan di Yugoslavianaparti Nord di Noruega cu tabatabou di supervision di SS entre 1942 y 1943.



## ESTADOS UNIDOS A LANTA E PROHIBICION DI IMPORTACION NA MAYANMAR

Washington – Estados Unidos diabierna a lanta e casi 10 añabieuw prohibicion di importacion riba mercancia procedente di Myanmar. E medida ta un estimulo

pa e reformation recien den e país, net prome cu e bishita historico di president Barack Obama na Myanmar. E gobierno Americano a bisa cu e economia mayor den mundo ta habri su portanan pa productonan for di e país isola pa hopi tempo, anteriormente conoci como Birma. Un excepcion ta existi ainda pa e importacion di piedranan precioso, un sector cu ta ser mira como e motor importante di corrupcion y violencia. E paso ta destina pa sostene e reformation en curso na Myanmar, pa stimula cambionan nobo, pero tambe pa brinda oportunidadnan pa empresanan di Brima y Estados Unidos, segun e comunicado di prensa.





# NOTICIANAN INTERNACIONAL

## PARLAMENTO HAPONES DISOLVE



Tokio – Haponesnan por bay urna riba 16 di December. E Gabinet di Prome Ministro Yoshihiko Noda diabierna a bay di acuerdo cu disolvemento di e parlamento. Esey ya caba a ser spera di basta tempo. Politica Hapones ta caprichoso: e actual Prome Ministro Noda

ta e di sexton hende homber cu ta ocupa e funcion den seis aña. El a priminti previamente caba eleccionnan. A cambio di esaki oposicion a sostene propuestanan cu a haci prestamonan estatal posibel y mester frena e enorme deuda estatal. Nod su centro izquierdista partido politico democratico di Hapon na 2009 a asumi poder pa prome biaha. Segun encuestanan e partido ta para na perdidanan substancial. E centro derechista partido politico Liberal Democratico (LDP) bao di liderazgo di ex-Prome Ministro Shinzo Abe actualmente ta e partido di mas grandi den e encuestanan.

## SOSPECHOSO DI ETA DETENI NA LIVERPOOL

Madrid – Polis Britanico a detene den e portuario di Liverpool un homber cu ta ser sospechoso cu e ta miembro di e movimiento terrorista Basco cu tabata responsabel pa varios asesinatonan. Esey e ministerio di Relacion Interior na Madrid a anuncia.

Raul Fuentes Villota a ser deteni na 1991 cu dos otro, na momento cu nan kier a haci un atentado di atake di bom riba un agente policial na Basco. Cuater aña despues el'a ser scapa, pasobra e no por a permanence mas den su pre-arresto. Desde e tempo ey e ta un fugitivo.



## ABSOLUCION PA GENERAL GOTOVINA DI CROACIA



Den Haag – E Tribunal Penal Internacional na Den Haag a absolve e principal sospechoso Ante Gotovina diabierna den Corte Superior di e cargonan di crimen di guerra. E ex-general a ser condena aña pasa den Corte di Prome Instancia na 24 aña castigo di prison pa su rol durante Operacion Tormenta. Esey tabata e limpieza mayor etnico den un solo biaha durante e conflicto entre Serbio y Croatanan den e desintegracion di Yugoslavia. E president di Croacia Franjo Tudjman a laga su ehercito bay den ofensivo na 1995 contra e Republica di Krajina, e estado auto proclama cu a funda e serbionan etnico den un parti di Croacia. Miles di Serbionan etnico a ser expulsado a huy. Serbionan anciano cu a ked atras cu no por a huy mas, a wordo asesina na un manera brutal.

## BP A PAGA 4.5 MIL MIYON NA MULTA PA DERAME DI PETROLEO



London – E gigante di energia Britanico BP ta paga Estados Unidos mas cu 4.5 mil miyondolarnamultarelacon cu e derame di petroleo devastador den e Golfo di Mexico na 2010. Esaki a empresa a duna di conocediahuebs ultimo. E suma total di mas cu 4.5 mil miyondolar ta incluydemandanan penal. BP ta paga e suma over di un period di seis aña, segun e declaracion. E suma ta surpasadecena di mil miyon cu e consorcio ta pagan a daño y perjuicio. Ademas di e multanan penal di 4 mil miyon cu e ministerio di Husticia a impone, BP ta pagando ainda 525 miyondolarna e SEC (Securities & Exchange Commission). BP a bisa cu e deuda a conoce pa 11 cargo di crimen, mal conducta y negligencia relaciona cu e morto di 11 trahador. E reputacion di e compania a cay dos aña y meiparaseveramentedañadespues di explosion riba e plataforma di petroli.





## DIADOMINGO 18 NOVEMBER

ta cuminza cu e nobena na honor di e birgen di e medaya milagroso como preparacion pa su fiesta dia 27 november. riba e dia aki pa 7:30 pm sra wini croes y dora koolman-croes y famia ta habri porta di nan cas na morgenster 98 pa tur hende cu ta desea di uni cu nan famia den oracion . tur dia e nobena ta cuminsa 7:30 pm.

awe mas cu nunca nos tin di reza pa nos pais aruba. laga nos pone tur problema den e mannan bondadoso di nos mama celestial y confia cu su yiu hesus ta cla pa scucha tur nos petitionnan . nos forza ta nos oracion! pasobra oracion ta e solucion pa cualkier problema. den nos curazon nos tin e yabi pa alcanza paz na mundo. mama maria ta haci un yamada pa haci sacrificionan. laga nos paga tino na su yamada.

**Un famia cu ta reza ta keda uni .**

## The Art of Engraving NV

Nos ta duna tur servicio den Santana pa drecha kelder. Pa graba riba tur tipo di marble y granite. Nos ta haci tur tipo di top pa cushina y baño. Nos servicio ta encera: Diseño- engraving- photo ceramic- sandblasting riba marble- glas- spiel-palo y mucho mas. Pasa y admira nos coleccion

Rooi Afo 33C TEL: 588-4433  
Cell: 741-3449 Fax: 588-4433



## Mensahe di Divino Niño na Reginald Danje

Bendicion mi yiu nan stima di mi paraiso chikito y henter mundo. Ami Divino Niño Hesus tin hopi milager na caminda pa mundo di mi Tata y mi Mama y di tur Santo y Angelnan den cielo. Mi fiel sirbidornan no spanta ora boso mire e milagernan cu ta bay pasa, no spanta. Reza hopi. Esnan cu tin miedo di mi furianan, no tin fe y ta cobarde y nan ta stima nan mes y lubida cu mi Tata Dios ta existi cu ta duna y ta kita. Manera Mi ta escoge mi escogidonan cu ta chiktio y grandi. Pero tin hopi di mi escogidonan tin miedo di hiba mi mensahenan rond mundo pa motibo di blasfemia cu ta ataca nan dip lama mi mensahe. Mi sirbirdornan mira boso dilanti y sigui cu boso trabao pa Tata Cristo Hesus, no laga nada strobe boso den boso mision cu Dios a duna boso. No tene berguenza di adora Mi y alaba Mi. Reza hopi. Busca refugio cerca Mi, pasobra manera mi ta mira Gobernantenan ta bringa cu otro pa maneha cada pais riba mundo y nan ta lubida cu ta Mi ta e Unico cu ta Goberna henter mundo na mi manera y ta duna poder pa esnan cu ta lubida cu ta Mi ta e Dios riba boso cabez, cu por duna e poder pa yuda boso paisnan den mundo, y stop cu ofendemento di otro, pasobra tur loke cu tin riba mundo ta MI poder y boso ta haci obra y prepara pa loke ta bin. No warda malo bati na boso porta, pa boso busca MI cu ta boso Dios Tata y boso refugio y cu Spirito Santo lo bula riba mundo y hopi lo mire y pidi hopi pordon, y alaba sea Señor na cielo manera pa loke cu ta bin. Mi kier mira boso den e bon caminda Religioso y siña boso criaturanan reza e Santo Rosario tur dia pa yuda proha e mundo di maldad di tur cos malo cu ta bin di malisia, di engaño di banda robez, pero boso tin Mi Tata na man drechi cu ta proteha mundo. Pesey reza hopi y adora y canta Gloria na su Santo .

*Pa bo anuncianan di Fagecimento:*



solodipueblo@gmail.com  
Tel: 585-9500

Pakete economico ta inclui 3 anuncio completo, gradicimento y invitacion pa un prijs di Afl. 200.00  
**(prijs ta pa entiero y no pa dia)**

**PASTORAL APPRECIATION & CELEBRATION**

**Admission: FREE**

**NOVEMBER 11<sup>TH</sup>-18<sup>TH</sup>**  
LOCATION: CAYA BETICO CROES 175

Corporate Impact Ministries  
Contact: (297) 733-4525 / 592-7117

**PASTOR DONNIE MCCLURKIN**  
PERFECTING FAITH CHURCH (USA)  
Tue.-Wed. 7:30 p.m.

**PASTOR JENNIFER BROWN**  
POWER, PRAISE & DELIVERANCE (UK & SSM)  
Sun. 9:00 a.m.  
Mon.-Thur.-Fri. 7:30 p.m.  
Sun. 9:00 a.m.



Ki alegria, ora nan a bisa mi:

"Ban cas di Señor!"

Y awor, ata'mi aki para na bo porta Señor.

Salmo 122

Cu inmenso tristeza na nos curazon pero agradecido na Dios pa tur locual e la significa pa nos, nos ta participa fayecimento inespera di:



**Sra. Vda  
Genoveva  
Josefa Croes-  
Kelly**

mihor conoci como "Mamachi of  
Maveva"

\*08-01-1917 †15-11-2012

Ta invita pa asisti na e acto di entierro cual lo tuma lugar diamars 20 di November 2012 na misa Santa Anna pa 4'or di atardi despues saliendo pa Santana Catolico na Noord. E restonan di nos difunto stima lo ta reposa for di 2'or di merdia den misa.

Adres pa condolencia: Aurora Funeral Home, dialuna 19 di November 2012 di 7'or pa 9'or di anochi.

Lo bay tin un box disponibel pa un donacion na misa Santa Anna.

**"Den bo man Dios Hesus mi gran poder mi ta entrega mi mes"**

Cu inmensa tristeza na nos curason, nos ta participa fayecimento di nos princesa stimá:

**Jessica Luciana  
Goeloé**

\*28-03-1992 † 08-11-2012

Mihor conoci como "Jessy"



**Mama:**

Maritza y Esposo David de Cuba

**Tata:**

Alvaro Naranjo y Esposa Gloria

**Ruman:**

Nicolas Naranjo

**Mescos cu rumannan:**

Mauricio Peña, Dyron y Benazir de Cuba.

**Welanan:**

Lucia y Esposo Rafael Peña

Ana y Luis na Colombia

**Welonan:**

Ralph Goeloe y Esposa Margarita na Corsou

**Madrina:**

Stella Contreras-Hereira

**Padrino:**

Eddy Flanegin

**Bisawela:**

Dorotea Bell-Goeloe na Corsou

**Tanta y Omo grandi:**

Juju y esposo Nando Herera

Missy y Esposo † Nady Carrion

Irma Vrolijk

†Irena y †Bertus Ermstrang

Jhonny y esposa Diana Vrolijk

Margo y esposo Vale Croes

Ines y esposo Boei Flanegin

Lucille y Ruud Vermeer na Hulanda

Rupert y Winston Bell na Corsou

**Amigonan stima:** Stefany Croes, Gert y Paula y Graciela Zomer na Hulanda

Su preto di wowo: Sharline Winklaar

Tur su amiga y amigonan, su coleganan di "OLDE MOLEN"

Demas Famia: Goeloe, Vrolijk, De Cuba, Naranjo, Peña, Bell, Darnault, Vermeer, Hereira, Carrion, Ermstrang, Croes, Flanegin, Solognier, Boekhoudt, Winterdaal, Winklar, Van Hal, Zomer. Tur bon bisiña y conocirnan, na tur esnan cu a duna hopi oracion.

Acto di entierro lo tuma lugar awe diasabra 17 di November 2012, 2'or pa 4'or di atardi na Misa Inmaculada Concepcion y despues saliendo pa santana Catolico na Santa Cruz.

Nos ta pidi nos disculpa si den nos tristeza nos por a lubida un of otro famia. Nos tin un Box disponibel pa un donacion pa un bon causa.

A FAYECE  
CRISTIANAMENTE

**LUIS  
POLANCO**

NA PUNTO FIJO  
VENEZUELA

\* 26-10-45 + 11-11-12.

CU SR. LUIS  
POLANCO SOSEGA  
NA PAZ

FAMIA NA ARUBA:  
MARTINEZ,  
POLANCO, ANGELA  
,PINA.



Cu honda pena  
**The Champs Tennis Club**  
ta anuncia fayecimento di

**Sr. Guillermo Tromp,**  
Mihor conoci como "Papay"

Na bida tata di nos bon amigo y miembro  
**Rigo Tromp**

Cu Papai sosega na paz



# Turistanan di Hulanda gozando na Aruba



STA. CRUZ -- Algun turista di Hulanda a pasa algun dia masha dushi mes cu nan tour-guide Mahinder kende a musta nan Aruba y tur loke Aruba tin di ofrece. Ya dialuna nan vakantie ta pasando y pesey e weekend aki Mahinder ta all out y ta haci su best pa nan goza e resto di weekend pa asina nan bolbe bek otro aña. Mahinder ta desea nan un bon estadia y un bon viahe dialuna pa nan kikkerland bek!